

## Yech kwaan mkee Pab lo re xaa yezh Roma

### *Dix kwaan nzhé Pab lo re xaa yezh Roma*

<sup>1</sup> Dix re gu.

Na nak Pab, xaa nkee xchiin Jesucrist. Kakee na yech ne lo re gu, nel Dios mrezh na nu mleey xaa na, zee kayaa na yalnabeyy lo Jesucrist, nu mxaal xaa na zee za na kwent cheen wdizh chul cheen xaa.

<sup>2</sup> Lee wdizh chul ne nak kwaan nguné Dios lo re xaa mzaa kwent kwaan nzhé Dios lo lee xaa yilo, nu leeya nak kwaan mkee xaa lo Xkyech Dios. <sup>3</sup> Wdizh chul ne nak cheen Xgann xaa, xaa myaad ngok myet, naz lo dii cheen rey David, xaa mnabeyy yilo, <sup>4</sup> nu Mbi Naban cheen Dios mseban xaa lo yalgut, snee mlu xaa lee xaa nak Xgann Dios. Nu lee xaa nak Jesucrist, Xaa Nabeyy be.

<sup>5</sup> Kwent cheen lee xaa mlu Dios yalnkala cheen Dios lo be. Nu re nu mkayaa yalnabeyy lo Dios zee zaa nu kwent xtizh xaa lo re xaa nanakt xaa Israel, zee nzho mod wii xaa lo xaa. <sup>6</sup> Nu re gu, xaa yezh Roma nak xaa zee, nel Jesucrist mrezh gu zee gak gu xaa xaa. <sup>7</sup> Nu nkedoola Dios gu, zee mleey xaa gu gak gu nambey lo xaa. Nzhekla na luu Xuz be Dios, nu Jesucrist Xaa Nabeyy be, yalnkala cheen xaa lo rese gu; zee noka le xaa kwi wen re gu.

### *Pab nzhekla ya lo re xaa Roma*

<sup>8</sup> Yilotlaka mza na dixkix lo Dios, kwaan yalnabeyy cheen Jesucrist, nel rese myet, xaa dubse yizhyo nzaa kwent xomod ngwii gu lo Jesucrist. <sup>9</sup> Nu kwaan dub lextoo na nkee na zhiin lo Dios, kwaan zee nza na kwent cheen wdizh chul cheen Xgann xaa; nu ne xaa yizata mbizh naab na lo xaa kwent cheen re gu. <sup>10</sup> Nu tubka naab na lo xaa,

chelee xaa nzhekla zee ne che nzho mod yal na lo gu. <sup>11</sup>Nle doo na xgab yal na lo gu zee nzho mod le na yudar re gu, zee nyera zo gu lo Dios. <sup>12</sup>Kwaanzee lee mod ngwii tub be stub be lo Dios, nle zee yo balor lextoo rese be.

<sup>13</sup>Wech nu bzan, nzhekla na ne na lo re gu; zyen doo welt mle na xgab yal na lo gu nel nzhekla na kee na xchiin Dios lo re gu, modxa mkee naya lo re stub naz xaa nanakt xaa Israel. Per nzho doo kwaan nleya zee nyent mod yal na lo gu. <sup>14</sup>Nzeeb doo na lo re myet zer za na kwent cheen Jesucrist lo xaa, lo re xaa nzhedizh gryeg nu lo re xaa nanzhedizhta, lo re xaa nzhak nu lo re xaa nagakt. <sup>15</sup>Kwaanzee nzhekla doo na yal na Roma, zee za na kwent wdizh chul cheen Dios lo rese gu.

#### *Yalngezh cheen wdizh chul*

<sup>16</sup>Nantont na za na kwent cheen wdizh chul nel leeya nak yalngezh cheen Dios, nu kwent cheen wdizh chul ne, Dios koo rese xaa ngwii lo Jesucrist lo yalgut, yilotlaka re sawlazzh na, xaa Israel, nu noka re xaa nanakt xaa Israel. <sup>17</sup>Nu wdizh chul ne nlu xomod nle Dios zee nali zo be lo xaa, chelee be ngwii be lo Jesucrist; nel nebse kwent xomod ngwii be lo Jesucrist nzho mod nzo be nali lo Dios. Nel nkeela lo Xkyech Dios nzhé: “Lee xaa ngwii lo Dios, nali nak xaa nu telisa ban xaa”. [Hab. 2:4]

#### *Re myet, xaa nlaa Dios, nle kwaan nawent*

<sup>18</sup>Nlu lee yalnayii cheen Dios nze naz yiba la tich rese xaa nle kwaan nawent nu tich rese xaa nanalit nzo lo Dios, nu tich rese xaa nanzheklat le krer kwaan wli. <sup>19</sup>Zee nzho mod ne rese myet xomod nak Dios, nel leeka Dios mluya lo rese xaa, axta naz leen lextoo xaa. <sup>20</sup>Nanlut Dios, per klar doo nlu xomod nak Dios lo rese myet kwent cheen re kwaan mdexkwaa Dios. Kwaanzee axta leezha mdexkwaa Dios yizhyo, mlu xomod nak Dios, xomod ngezh doo nak Dios, nu xomod nzhuul doo nak Dios. ¡Kwaanzee lee re

xaa nle kwaan nawent nyent kwaan keb xaa lo Dios gorna naab Dios kwent lo xaa! <sup>21</sup> Nixa nela xaa xomod nak Dios per nangwiit xaa lo Dios, nu nixa dixkix nanzaat xaa lo Dios; kwaanzee nangoknont re xgab kwaan mle xaa; kwaan nachan mle xaa xgab, tira mkaw yek re xaa. <sup>22</sup> Mbezh xaa nzhak doo xaa per ngok nachan xaa, <sup>23</sup> nel mlaa xaa xcheen Dios, kwaan chul doo, xaa tira nayeta, kwent cheen re maj, re maj kwaan nlu mod myet, nu mod re mbyin, nu mod re ma tap nii, nu mod re mball, nu rese kwaane lux.

<sup>24</sup> Kwaanzee mlayaa Dios xaa, zee le xaa rese kwaan nzhekla xkwerp xaa, rese kwaan nawent, rese kwaan nzhaal ton xaa le xaa. <sup>25</sup> Nel mlaa xaa re kwaan wli cheen Dios kwent cheen re kwaan nawlit; nu nlenon xaa rese kwaan mdexkwa Dios nu nzholl xaa loya, per namlenont xaa Dios nu nixa nambillt xaa lo Dios, xaa tubka nzhaal gool xaa lo. ¡Snee naka!

<sup>26</sup> Kwaanzee tira mlayaa Dios xaa, zee le xaa rese kwaan nzhekla xkwerp xaa, rese kwaan nzhaal ton xaa le xaa. Axta re ngwnaa mlaa me nachaaltra me sa me, nu nchaal me leeka sa ngwnaa me, tub kwaan namzeyalt Dios le me. <sup>27</sup> Nu leeka snee lee re xaabyi, nchaal xaa leeka sa byi xaa. Kwaanzee nlaa xaa xngwnaa xaa nu nle xaa rese kwaan nzhekla xkwerp xaa, nu nchaal xaa leeka sa byi xaa, tub kwaan tira nawent. Nu kwaane nle zee nded doo xaa bid lo re kwaan nawent kwaan nle xaa.

<sup>28</sup> Nel nanzheklat xaa labeyy xaa Dios kwaanzee tira mlayaa Dios xaa, zee le xaa kwaan nzhak yek xaa, kwaan nanzhaalt le xaa. <sup>29</sup> Nu ngok xaa:

tub xaa tira nanalit,  
 xaa nawent,  
 xaa nzoblazh,  
 xaa nzho kwaan jwyer lextoo,  
 xaa nzho yalnzoblazh lextoo,

xaa nzhut wechxinn,  
 xaa ndildiizh,  
 xaa nkade,  
 xaa nakap,  
 xaa nchech diizh,  
<sup>30</sup> xaa nzhedizh nawent stub xaa,  
 xaa nayii ne Dios,  
 xaa nkwaan dil,  
 xaa nto yalxwa,  
 xaa ngab stub naz kwaan nawent yek,  
 xaa nanzhont xtizh xuz nixa xtizh xnaa,  
<sup>31</sup> xaa ned doo,  
 xaa nkade nu nanlet re kwaan nii,  
 xaa nyent yalnkelala lextoo,  
 xaa nanlest lextoo ne wechxinn.  
<sup>32</sup> Nu nixa ne wen xaa lee Dios nzhé: “Loka xaa le re  
 kwaan nzhahal yet xaa”. Per mas nzhahal xaa nle xaaya, nu  
 axta nyakdoola xaa ngwii xaa lee stub xaa nle re kwaan  
 nawent ne.

## 2

### *Dios naab kwent tub mod nali*

<sup>1</sup> Kwaanzee leezhal ngaazh be tub kwaan tich wechxinn  
 be, nankanot be kwaan keb be lo Dios, nel leeka kwaan  
 ngaazh be tich wechxinn be, ngaazh be leeka tich be.  
<sup>2</sup> Nela be, nali naab Dios kwent lo re xaa sbaa nle.  
<sup>3</sup> Kwaanzee, ¿cho kwaan nzak gu? Leezhal ngaazh be tub  
 kwaan tich wechxinn be nu nle be leeka kwaan nle xaa,  
 nalet be xgab lee be nzho mod xonn lo yalnayii cheen  
 Dios. <sup>4</sup> ¿Che nanont yalnkelala cheen Dios lo be nu xomod  
 nanyachetla xaa ne xaa be? ¿Chozhiin nanzeent be, lee  
 yalnkelala cheen Dios nak kwaan le zee laa be kwaan nawent  
 kwaan nle be nu wii be lo xaa? <sup>5</sup> Per nel ned be zee nanet  
 be wii be lo Dios, zee kazhibra be zyenra yalnayii cheen  
 Dios tich be, axta zhin mbizh kwaan naab Dios kwent lo  
 rese myet tub mod nali, <sup>6</sup> nu kix Dios lo kad tub xaa kwaan

mle xaa. <sup>7</sup> Lee re xaa nanguzhat le kwaan wen, nak xaa nkwaan xni cheen Dios, nu nkwaan xaa zee wii wen Dios lo xaa, nu nkwaan xaa zee ban xaa tira, zee zaa Dios yalnaban kwaan tira lo xaa. <sup>8</sup> Per lee re xaa nkwaan leeka cheen nu nanzat yek gon re kwaan wli, sinka nreke xaa tich re kwaan nawlit, Dios naab kwent lo xaa kwaan yalnayii cheen Dios. <sup>9</sup> Per la yalnayii cheen Dios tich rese xaa nle re kwaan nawent nu nales doo gak lextoo re xaa ne. Yilotlaka sawlazzh na, xaa Israel, ted Dios bid, per noka ted xaa bid re xaa nanakt xaa Israel. <sup>10</sup> Per lo re xaa nle kwaan wen, Dios wii wen lo xaa nu zaa xni lo xaa nu le xaa kwi chul xaa kwaan lee xaa. Yilotlaka le xaaya lo re nu, per noka le xaaya lo re xaa nanakt xaa Israel.

<sup>11</sup> Nel lal naab Dios kwent lo rese myet. <sup>12</sup> Rese xaa mle kwaan nawent naab Dios kwent lo. Rese xaa nankanot ley kwaan mzaa Dios lo nu, Dios ted xaa bid kwent cheen re kwaan nawent kwaan mle xaa. Nu rese nu, xaa nkano ley kwaan mzaa Dios lo nu, Dios naab kwent lo xaa mod nzhé ley kwaan mzaa Dios lo nu. <sup>13</sup> Nu nanakta nebse re xaa kwaan nkenzha ley kayaa Dios mod xaa nali, sinka xaa nle kwaan nzhéya, nali nak. <sup>14</sup> Per leezha lee re xaa nanakt xaa Israel, nle xaa mod nzhé ley, nixa nankanot xaa ley kwaan mzaa Dios lo re nu, kwaan ba nak mod nkano xaa ley cheen Dios naz leen lextoo xaa. <sup>15</sup> Nel lo re kwaan nle xaa nlu nkano xaa ley naz leen lextoo xaa. Leeka lextoo xaa nlu lo xaa zee ne xaa cho kwaan kale xaa, kwaan wen o kwaan nawent, <sup>16</sup> axta mbizh kwaan zob Dios Jesucrist naab kwent lo rese kwaan xlaan kwaan mle re myet. Snee nii wdizh chul kwaan nza na kwent.

*Re xaa wlipa nak xaa Israel*

<sup>17</sup> Kwaanzee mbezh lu nak lu tub sawlazzh be, nu ngwii lu lo ley kwaan mzaa Dios lo Ches nu nto lu yalxwa nel xaa Dios nak lu. <sup>18</sup> Mbezh lu nela lu cho kwaan nzhekla Dios le lu, nel nlabeyy lu ley, zee nela lu cho kwaan wen

nzhaal le re myet. <sup>19</sup> Nu nzak lu nzho mod luu lu xnaz Dios lo re xaa nak mod syeg, nu nzak lu nzho mod yazaa lu xni lo re xaa nzho lo yalnakaw. <sup>20</sup> Nzak lu nzho mod lu lu re kwaan wen lo re xaa nagakt, nu nzak lu nzho mod seed lu re xaa nagakt xtizh Dios, nel nkano lu ley kwaan mzaa Dios, nel lo Xkyech Dios nkee re yalnzhak nu re kwaan wli. <sup>21</sup> Kwaanzee chelee lu mbezh lu, nseed lu stub naz xaa xtizh Dios, ¿chozhiin nanseedt lu leeka lu? Nzaa lu kwent nawent lewann xaa, ¿chozhiin nlewann lu? <sup>22</sup> Mbezh lu nawent chaal xaa stub ngwnaa, ¿chozhiin nle luya? Mbezh lu nayii lu ne lu re maj, ¿chozhiin nlewann lu kwaan nzho leen xkyidoo maj? <sup>23</sup> Nto doo lu yalxwa nel Dios mzaa ley lo lu, ¿chozhiin nanlet lu kwaan nzhé ley? ¿Kwaane nle zee nawent nii re myet Dios! <sup>24</sup> Kwaanzee kwentaxa nkeeya lo Xkyech Dios: “Nawent nii re xaa nanakt xaa Israel Dios, kwent cheen re gu”. [Is. 52:5]

<sup>25</sup> Wli, chelee lu nle lu kwaan nzhé ley kwaan mzaa Dios lo Ches, wena, nel mchoog lu tik baal cho lu, zee nzho lu beyy cheen nu, xaa Israel. Per chelee lu nanlet lu kwaan nzhé ley nixa mchoog lu tik baal cho lu kwaan nak beyy cheen re nu, nanakt lu kwenta tub re nu, xaa Israel. <sup>26</sup> Per lee re xaa nangut beyy cheen re nu, nu nle xaa kwaan nzhé ley, nak xaa kwenta tub xaa sawlazzh nu, xaa Israel, xaa nzho beyy. <sup>27</sup> Loka xaa nle kwaan nzhé ley, nixa nanzhot xaa beyy cheen nu, telisa ngaazh xaa kwaan tich re xaa nkano ley per nanlet xaa kwaan nzhéya, nixa nzho xaa beyy cheen nu. <sup>28</sup> Nel re xaa wlipa nak dii Israel, nanakta re xaa gol lo xey nu Israel, nixa nzho xaa beyy cheen nu cho xaa, nel re xaa wlipa nzho beyy cheen Dios naz leen lextoo xaa, xaa ne nak xaa wlipa nak dii Israel. <sup>29</sup> Lee xaa wlipa nak dii Israel, nzho xaa beyy cheen Dios naz leen lextoo xaa, nu nanakta nel mroog tik baal cho xaa, mod nzaa ley kwent, sinka leeya nak tub kwaan mle Mbi Naban

cheen Dios naz leen lextoo xaa. Nanont kwaan nle re myet xgab, kwaan non lo xaa nak nix nzhak lextoo Dios ne xaa.

### 3

<sup>1</sup> Nixa sneeya, nix doo nzhak lextoo re nu, xaa Israel, xaa nzho beyy cho, <sup>2</sup> nel Dios mzaa xtizh xaa lo re xaa dii Israel. <sup>3</sup> Wena, ¿per cho kwaan gak chelee tub sawlazzh nu laa nawiitra lo Dios? Sbaa naleet komba le zee laa Dios rese xaa dii Israel. <sup>4</sup> ¡Telisa nalaat Dios yalwen! Nel tubka nle Dios kwaan né xaa, nixa rese myet nak xaa nkade; nel lo Xkyech Dios nkee:

Dios, rese kwaan nzhé lu wli nak,  
nu chelee xaa naab xaa kwent lo lu,  
lu le gan lo xaa. [Sal. 52:4]

<sup>5</sup> Per chelee re kwaan nawent kwaan nle be, nlu lee Dios nak tub xaa nali, ¿cho kwaan yé be? Chol sbaa naka, ¿chozhiin nayii Dios leezha nle be kwaan nawent nu nted Dios be bid? ¡Per yalnabdizh ne nak tub kwaan nachan! <sup>6</sup> ¡Telisa nawlit lee Dios nak tub xaa nakap! Nel chelee Dios nak tub xaa nanalit, ¿xomod naab Dios kwent lo rese myet yizhyo?

<sup>7</sup> Lak xaa mbezh: “Wen naka chelee na nkade na nel zee mas klar nlu re kwaan wli cheen Dios, zee nlu wen nak Dios. Cheleeya sbaa naka, zee nanzhaalt naab Dios kwent lo na, kwent cheen re kwaan nawent kwaan mle na.” <sup>8</sup> Chol sbaa naka, zee nzho mod yé be: “Nzhaal le be re kwaan nawent, zee mas klar luu kwaan wen”. Lak xaa mbezh sbaa nlu nu, per nawlit xaaya, telisa lee Dios ted xaa ba bid.

#### *Rese be nak xaa nzeb jwalt*

<sup>9</sup> ¿Cho kwaan nzak gu? ¿Che re nu, xaa Israel, nak xaa xwara lo stub naz myet? ¡Nawlita! Nel mod mkeela na, Dios naab kwent lo rese xaa, lo re xaa dii Israel nu noka lo re xaa nanakt dii Israel. <sup>10</sup> Nel lo Xkyech Dios nzhé:

¡Nik tub xaa nali nyent!

¡Nik gola tub xaa!

<sup>11</sup> Nik tub xaa nanzaat yek,  
nu nik tub xaa nankwaant Dios.

<sup>12</sup> Rese xaa mlaa Dios,  
rese xaa mzen naz nawent,  
lal ngok rese xaa zee nyentra sirb re xaa.

¡Nik tub xaa nle kwaan wen nyent!

¡Nik gola tub xaa! [Sal. 14:1-3]

<sup>13</sup> Lee yeer yenn xaa nak mod baa kwaan nzoxal,  
nu roo xaa nroo kwaan nkade xaa. [Sal. 5:9]  
Nu re wdizh kwaan nii xaa nak mod xttox mball. [Sal.  
140:3]

<sup>14</sup> Nu kwaan roo xaa nge xaa lo re myet  
nu nii xaa re wdizh nala lo re myet. [Sal. 10:7]

<sup>15</sup> Nu kwaan rop nii xaa nrexonn xaa, gut wechxinn xaa.

<sup>16</sup> Palpa nzha xaa nle xaa ndil re myet nu nted xaa re myet  
bid.

<sup>17</sup> Nu nanlabeyyt xaa naz kwaan nle zee kwi wen re xaa.  
[Is. 59:7-8]

<sup>18</sup> Nu tira nanzhebt xaa ne xaa Dios. [Sal. 36:1]

<sup>19</sup> Nela be, rese kwaan nii ley cheen Dios, leeya nii lo  
re xaa ngwii lo ley. Kwaanzee nik tub myet nyent mod  
né: “Nanet na cho kwaan nak jwalt”. Nel Dios naab kwent  
lo rese myet. <sup>20</sup> Nyent mod zo wen myet kwaan Dios nel  
ngwii xaa lo ley. Nel nebse non ley, zee luu, be nak tub xaa  
nzeb jwalt.

*Le xaa gan yalnaban nel ngwii xaa lo Jesucrist*

<sup>21</sup> Per nal mlu Dios nen xomod zo be nali lo xaa, nu  
nanakta nel ngozhaw be ley cheen Ches, nel leeka ley nzaa  
kwent xomod nzhaal zo be nali lo Dios nu noka re xaa yilo,  
xaa mzaa kwent kwaan nzhé Dios lo lee xaa, mzaa kwent  
xomod nzhaal zo be nali lo Dios. <sup>22</sup> Nu nali nzo be lo Dios  
nal, nel ngwii be lo Jesucrist. Nu kwent cheen xaa rese



myet nzho mod zo nali lo Dios nel delant lo Dios lal nak re myet. <sup>23</sup> Rese myet mle jwalt nu tira nanalit nzo xaa lo Dios. <sup>24</sup> Per nel nkela Dios rese be, mle xaa be mod tub xaa nik tub jwalt namlet, kwent cheen kwaan mle Jesucrist, leezha ngut xaa zee mdix xaa rese jwalt cheen be. <sup>25</sup> Mlaa Dios ngut Jesucrist delant lo rese myet zee gorna mxo xaa xren xaa ngok xaa tub xaa mchee jwalt cheen rese myet, xaa ngwii lo xaa. Nel myedoola Dios ne re be nazskweeze, nu nangunaabt xaa kwent lo re jwalt kwaan mle be, <sup>26</sup> nel nzhekla xaa luu xaa lee xaa nak xaa nali re mbizh ne. Nu nal seetaka nali nak xaa, nu nkiib xaa jwalt tich re xaa ngwii lo Jesucrist zee noka lee xaa gak xaa nali lo Dios.

<sup>27</sup> Kwaanzee, ¿paro nlake yalxwa cheen myet lo Dios? ¡Mluxa! Nel nyent mod zo xaa nali lo Dios nel ngozhaw xaa ley cheen Dios; kwaanzee nebse xaa ngwii lo Jesucrist nzho mod zo nali lo Dios. <sup>28</sup> Kwaanzee re kwaan nzhekla na nii na lo gu nak kwaane, Dios mkiib jwalt tich re myet zee nali gak xaa, nebse nel ngwii xaa lo Jesucrist, nu nanakta nel nle xaa re kwaan nzhe ley. <sup>29</sup> ¿Napa nel Dios nak Dios nebse cheen re xaa nak xaa dii Israel, xaa nkano ley? ¿Che nanakt Dios cheen rese myet yizhyo? Klar doo nak kwaane, Dios nak Dios cheen rese xaa dubse yizhyo, <sup>30</sup> nel tubka Dios nzho. Dios nle nali re xaa ngwii lo Jesucrist, nexa chol nzho xaa beyy cheen nu o nanzhot xaaya. <sup>31</sup> Kwaanzee, ¿cho kwaan nzak gu? ¿Che nle be nanont ley nel ngwii be lo Jesucrist? ¡Telisa nawlita! Sbaa nlu be nen xomod non ley.

## 4

### *Kwaan nzho mod seed be lo Abraham*

<sup>1</sup> Kwaanzee, ¿xomod nali mzo Abraham lo Dios, xaa nak xey rese nu, xaa nak dii Israel? <sup>2</sup> Chol nali mzo Abraham lo Dios kwent cheen mod mlozhaw xaa ley, zee nzho mod

to xaa yalxwa. Per nanakta sbaa, kwaanzee nyent mod to xaa yalxwa delant lo Dios. <sup>3</sup> Nel Xkyech Dios nzhé: “Abraham mwii lo Dios, kwaanzee Dios mkayaa xaa mod tub xaa nali”. [Gn. 15:6] <sup>4</sup> Kwaanzee nal chelee tub xaa nkee zhiin, lee demi kwaan nle xaa gan nanakta tub kwaan sbaasa nzelazh xaa lo xaa, leeya nak tub kwaan mle xaa gan mkee xaa zhiin. <sup>5</sup> Per lo Dios xa naka. Nanakt xaa ngozhaw ley, mod tub xaa nkee zhiin, xaa mkayaa Dios mod xaa nali lo xaa; per re xaa nebse ngwii lo xaa, sbaa nle Dios nali re xaa nanalit nak. Nu sbaa nkayaa Dios xaa nel ngwii xaa lo xaa. <sup>6</sup> Noka lee rey David nzhé, nix doo nzhak lextoo re xaa kayaa Dios kwenta tub xaa nali, nexa cho kwaan nle xaa. <sup>7</sup> David nzhé: Nix doo nzhak lextoo re xaa mchela Dios re jwalt cheen; nyakdoola xaa, nel tira namselazhtra Dios re jwalt cheen xaa kwaan mle xaa.

<sup>8</sup> Nix doo nzhak lextoo xaa

nel nanaabt Dios kwent lo xaa! [Sal. 32:1-2]

<sup>9</sup> Cho kwaan nle re gu xgab? Cho nebse re nu, re xaa nzho beyy, nzhaal kayaa yalnix ne lextoo o che noka nzhaal kayaaya re xaa nanakt xaa Israel, xaa nanzhot beyy? Bin gu kwaan ngunii na: “Abraham mwii lo Dios, kwaanzee Dios mkayaa xaa mod tub xaa nali”. [Gn. 15:6] <sup>10</sup> Per, cho gor mkayaa Dios Abraham? Cho gorna ngulo ngu xaa beyy cheen re nuya o leezha zeeraka yo xaa beyy cheen nuya? Axta leezha zer yo Abraham beyy, Dios mkayaa xaa mod tub xaa nali nu nanakta leezha ngu xaa beyy. <sup>11</sup> Dios mzaa beyy ne lo xaa mod tub nseyn kwaan nlu nali nak xaa lo Dios nel ngwii xaa lo Dios. Nu mwii xaa lo Dios leezha zer kayaa xaa beyy ne, zee snee Abraham nak xuz rese xaa ngwii lo Dios, nixa nayot xaa beyy cheen nu. Dios nkayaa rese xaa mod xaa nali, rese xaa ngwii lo

xaa, mod mwii Abraham lo xaa. <sup>12</sup> Nu noka nak Abraham xuz rese xaa nzho beyy cheen nu, chelee xaa ngwii xaa lo Dios mod mwii Abraham lo Dios, leezha zeeraka yo xaa beyy cheen nu.

*Kwaan non nak wii be lo Dios mod mwii Abraham lo Dios*

<sup>13</sup> Dios mlaa wdizh lo Abraham nu lo re dii cheen xaa, lee Dios zaa yizhyo lo re dii cheen xaa. Per namlaat xaa diizh ne nel mle Abraham kwaan nzhé ley, lee xaa mlaaya nel mwii Abraham lo Dios; nu kwaanzee Dios mkayaa Abraham mod tub xaa nali. <sup>14</sup> Per cheleeya nebse re xaa nle kwaan nzhé ley kayaa kwaan mlaala Dios diizh, zee nalechiint wii xaa lo Dios nu lee xtizh Dios nagakontra. <sup>15</sup> Lee ley kwaan mzaa Dios lo Ches nyaadno yalnayii cheen Dios nel nyent mod kozhaw myeta; per pa nyent ley nyent mod ngaazh xaa jwalt tich stub myet.

<sup>16</sup> Kwaanzee, lee diizh kwaan nzhé Dios lo Abraham nu lo re dii cheen xaa, nu noka mlaa xaaya lo rese be, xaa ngwii lo Jesús. Nanakta nebse cheen re xaa nle kwaan nzhé ley, leeya nak cheen rese be, xaa ngwii lo Dios kwenta Abraham. Nu sbaa lee Abraham nak xuz rese be. <sup>17</sup> Konxa nzhé Xkyech Dios: “Nel mle na gak lu xuz zyen doo yezh lo yizhyo”. [Gn. 17:5] Xaa snee nzhé nak Dios, xaa mwii Abraham lo, nu lee xaa nzaa yalnaban lo re xaa ngut, nu lee xaa ngaxkwaa re kwaan nyent zee gaka, nu nle xaaya nebse kwaan xtizh xaa. <sup>18</sup> Nu nzhé xaa lo Abraham: “Snee gak zyen doo dii cheen lu”. [Gn. 15:5] Kwaanzee nixa nyentra mod gak wdizh kwaan mlaa Dios lo xaa, nel goxla Abraham, per tubka mwii Abraham lo Dios nu mkwaz xaa kayaa xaaya lo Dios, zee sbaa ngok xaa: “Xuz zyen doo yezh”. <sup>19</sup> Lee xgab cheen Abraham nik tub rat nangokt chop. Nzhola xaa tub gayoo liin nu nzeenla rop sa xaa Sara mer yet rop sa xaa, nu ngox doo xaa, nu nyent mod kano sa xaa mad. <sup>20</sup> Nu nixa sbaaya,

tubka nzak xaa lee Dios le kwaan nzhé Dios lo xaa. Per lee xaa mwii lo Dios nu mas mle xaa xgab lee Dios leya, zee mbill xaa lo Dios. <sup>21</sup> Ne wen xaa lee Dios nkano yalngezhe le wdizh kwaan nzhé Dios lo xaa. <sup>22</sup> Kwaanzee mkayaa Dios xaa mod tub xaa nali.

<sup>23</sup> Nu leezha nzaa Xkyech Dios kwent xomod mkayaa Dios Abraham mod tub xaa nali, nu re wdizh ne mkee zee nlu xomod mle Abraham; <sup>24</sup> zee noka re be nzhaal le be mod mle Abraham. Nel noka be ngwii lo Dios, xaa mseban Jesucrist, Xaa Nabeyy be, nu sbaaka nkayaa Dios re be mod xaa nali, <sup>25</sup> nel lee Jesucrist ngut kwent cheen re jwalt cheen be nu mroban xaa zee nali zo be lo Dios.

## 5

*Rese be nzhul nak be lo re jwalt cheen be nel ngwii be lo Jesucrist*

<sup>1</sup> See nal, nali nzo be lo Dios nel ngwii be lo Jesucrist, Xaa Nabeyy be; nu nzhi wen be kwaan Dios. <sup>2</sup> Nel ngwii be lo Jesucrist zee nyakla be nkayaa be re yalwen kwaan nzaa Dios lo be, noka nyakla be nkambaz be yo be kwaan Dios lo xni chul doo cheen xaa. <sup>3</sup> Nu nanakta nebse kwaane, noka nyakla be nel nded be re yalzi; nel ne be leezha ded be re yalzi zee mas nyela be. <sup>4</sup> Nu leezha nyela be zee mas nyakla Dios ne be, nu leezha ne be lee Dios nyakla, zee mas tubka nkambaz be kwaan zaa xaa. <sup>5</sup> Nu leezha nkambaz be kwaan zaa xaa, telisa kayaa beya. Sbaa ne be: Lee Dios mchezhe lextoo be kwaan yalnkala cheen xaa, kwaan Mbi Naban kwaan mzaa xaa lo be.

<sup>6</sup> Nel leezha nyent mod zo nali be leeka be lo Dios, Jesucrist myaad ngut kwent cheen rese myet, xaa nanalit nak, mer mbizh kwaan mleey Dios yet xaa. <sup>7</sup> Wlipa na nagan doo zaa tub xaa diizh yet xaa kwent cheen stub xaa, nixa nebse kwaan nali nle xaa. Talbes nzho tub xaa zeyal yet kwent cheen stub xaa, wlipa wen doo nak.

<sup>8</sup> Per mlu Dios yalnkala cheen Dios lo be, leezha lee re be seetaka nak tub xaa nanalit lo xaa, zee lee Jesucrist ngut kwent cheen rese be. <sup>9</sup> Nu nalsi, nzhul ngok be lo re jwalt cheen be nel ngut Jesucrist, nu Jesucrist la be lo yalnayii cheen Dios. <sup>10</sup> Nel leeka Jesucrist mzo wen be lo Dios, leezha seesa nle be kwaan nanzheklat Dios, nu mzaa Dios Xgann xaa, Jesucrist, ngut, zee kwi wen be kwaan Dios. Kwaanzee nalsi nzhiwenla be kwaan Dios; nel Jesucrist mzaa yalnaban cheen, zee le be gan yalnaban cheen be. <sup>11</sup> Nu kwaanzee nyakdoola be nel nzhi wenla be kwaan Dios, kwent cheen kwaan mle Jesucrist, Xaa Nabeyy be.

*Kwaan mle Dan nu kwaan mle Jesucrist*

<sup>12</sup> Nel kwaan mle tubka myet, xaa le Dan, mle zee mzeeb jwalt leen dubse yizhyo nu kwaanzee noka myaad yalgut lo dubse yizhyo; kwaanzee rese myet nzhet nel rese myet nle jwalt. <sup>13</sup> Leezha zeeraka zaa Dios ley lo Ches, nzhola jwalt lo yizhyo; nixa zeeraka naab Dios kwent lo re myet, nel zeeraka zaa xaa ley lo Ches. <sup>14</sup> Per nixa seeya, axta mbizh cheen Dan nu axta mbizh cheen Ches, rese xaa ngut, nexa chol namlet xaa jwalt kwaan mle Dan. Kwaan mle Dan mded lo rese myet, sbaaka lee kwaan mle Jesucrist, xaa myaad gwluzh, mded lo rese myet.

<sup>15</sup> Per nalalt nak jwalt cheen Dan kwaan kwaan mzelazh Dios lo be. Nel jwalt cheen tubka myet mle zee zyen doo myet ngut. Per lee yalnaban kwaan ndii tira, mzaa Dios lo be nel nkela xaa be, nu nzaa xaaya lo zyen doo myet kwent kwaan mle stub xaabyi, xaa le Jesucrist. <sup>16</sup> Lee jwalt cheen tubka xaa nyent mod gak lal kwaan kwaan mzelazh Dios lo be, nel nebse kwent cheen tubka jwalt nzhet re myet, per lee kwaan mzelazh Dios lo myet nle zee zyen doo jwalt cheen re myet zhe. <sup>17</sup> Nel lee yalgut nabeyy lo yizhyo nebse kwent cheen jwalt kwaan mle tubka myet; kwaanzee telisa lee yalnaban nabeyy leen

lextoo re xaa mle Dios nali nel ngwii xaa lo tubka xaabyi, xaa nak Jesucrist. Nu yalnaban ne zaa xaa lo be nel nkela xaa be.

<sup>18</sup> Nu kwaanzee snee nebse jwalt cheen Dan mle zee rese myet nzhet, nu sneeka lee kwaan nali kwaan mle Jesucrist mle zee nanaabt Dios kwent lo myet, nu sbaa kano myet yalnaban. <sup>19</sup> Kwaane nak, nel tubka myet nambint xtizh Dios, zee zyen doo myet ngok xaa nzeb jwalt; per leeka snee, tubka myet mbin xtizh Dios, zee zyen doo myet zhe rese jwalt cheen.

<sup>20</sup> Lee ley cheen Dios nyaad zee gakbeyy xaa xomod nak re jwalt. Per leezha ngokbeyy xaa xomod nak re jwalt, mas mlu Dios yalnkala cheen xaa lo re myet. <sup>21</sup> Nu nii na lee jwalt mkano yalnabeyy nyaadno yalgut, nu sneeka lee yalnkala cheen Dios nkano yalnabeyy, zee gak be nali lo xaa kwent cheen Jesucrist, Xaa Nabeyy be, nu sbaa nkano be yalnaban kwaan tira.

## 6

*Nak be mod tub xaa ngut lo jwalt per mban be kwaan Jesucrist*

<sup>1</sup> Zee, ¿cho kwaan nzak gu? Nawent chelee be seesa zlera be jwalt zee luura Dios wen doo nak, nel nchee xaa re jwalt cheen be. <sup>2</sup> ¿Tira nawent kwaane! Nel nak be mod xaa ngut lo re jwalt; kwaanzee nyent mod lera be jwalt stuba. <sup>3</sup> ¿Che nanet gu, leezha mrubnis be, tubka nak be kwaan Jesucrist lo yalgut cheen xaa? <sup>4</sup> Nel leezha nrubnis be, nak be mod tub xaa nzhet nu nyubyo kwaan Jesucrist, zee nroban be stub welt, nu nkano be tub yalnaban kwaan kub; konxa mroban Jesucrist kwaan yalngezh chul cheen Xuz xaa Dios, zee kano xaa stub yalnaban kwaan kub.

<sup>5</sup> Chelee be ngut be tubka kwaan Jesucrist seeka roban be kwentaxa mroban xaa. <sup>6</sup> Nela be lee re mod nak be

yilo mkee lo krus kwaan Jesucrist, kwaanzee lee re mod nak be yilo mlux, nu nal nanabeyytra jwalt lo be. <sup>7</sup> Nel leezha nzhet xaa, zee nyentra mod nabeyy jwalt lo xaa. <sup>8</sup> Nu chelee re be nak be mod tub xaa ngut tubka kwaan Jesucrist, noka nela be lee be roban nu yo be kwaan lee xaa tira. <sup>9</sup> Nela be lee Jesucrist mroban nu tira nayetra xaa stub welt. Lee yalgut nyentra mod nabeyyra lo xaa. <sup>10</sup> Nel tub weltaka ngut Jesucrist kwent cheen re jwalt cheen rese myet. Per nal mroban xaa nu kale xaa kwaan nzhekla Dios. <sup>11</sup> Nu seeka, noka nzhaal gak be mod tub xaa ngut lo re jwalt, per noka gak be mod tub xaa mban lo Dios kwent cheen Jesucrist.

<sup>12</sup> Kwaanzee, nalaat be nabeyy re jwalt lo xkwerp be, zee le be re kwaan nzhekla xkwerp be. <sup>13</sup> Kwaanzee nalaat be le xkwerp be kwaan nawent, zee le be kwaan nzhekla Maxuu. Mas wen zaa be dub xkwerp be lo Dios, nel mseban Dios be, zee le be kwaan nzhekla Dios. <sup>14</sup> Nu snee lee re jwalt nyentra mod nabeyy lo be, zee le be re kwaan nawent, nel nanabeyytra ley cheen Dios lo be, nel nal mlula Dios yalnkele cheen xaa lo be.

### *Nal nkee be zhiin lo Dios*

<sup>15</sup> Lak gu nle xgab lee nal nzho mod le be kwaan nawent nel nanabeyytra ley cheen Dios lo be, nel nzo be lo yalnkele cheen Dios. ¡Nanakta sbaa! <sup>16</sup> Ne wenla gu, nzho mod kweey be cho xaa nabeyy lo be, nu kee be zhiin lo xaa, zee le be kwaan nzhekla xaa. Chelee be kweey be kee be zhiin lo kwaan nawent zee yet be, o chelee be kweey be kee be zhiin lo Dios nu gon be xtizh xaa, zee gak be tub xaa nali lo Dios. <sup>17</sup> Per dixkix Dios, nel ngok be mos lo re kwaan nawent yilo, nu lee nal kwaan dub lextoo be kale be re kwaan mseed be cheen Dios. <sup>18</sup> Nal nanaktra be mos lo re kwaan nawent. Nal nkee be zhiin lo re kwaan nali. <sup>19</sup> (Mza na kwent ne, kwaan nded re be yizhyo ne, zee la

wen kwaane yek gu nel myet yizhyo ne nak be.) Kwaanzee chelee gu mkee gu zhiin lo kwaan nawent yilo, kwaanzee nal bzaa gu dub xkwerp gu lo re kwaan nali zee kano gu tub yalnaban naz lo Dios.

<sup>20</sup> Leezha seetaka nkee be zhiin lo kwaan nawent, per nik tik nanlet be xgab le be kwaan nali. <sup>21</sup> Per, ¿cho kwaan mle be gan lo re kwaan nawent mle be? Nebse mle be gan nton be. Nu lee re kwaan nawent mle be, nebse nzhanoya be naz lo yalgut. <sup>22</sup> Per nal, nanabeyytra re kwaan nawent lo be; nal lee be nkee zhiin lo Dios, nu mle xaa be xaa nali lo xaa, nu mzaa xaa yalnaban kwaan tira lo be. <sup>23</sup> Lee kwaan le be gan lo kwaan nawent nak yalgut, per lee kwaan nzelazh Dios lo be nak yalnaban kwaan tira, nel tubka nzo be kwaan Jesucrist, Xaa Nabeyy be.

## 7

### *Nal nanabeyytra ley lo be*

<sup>1</sup> Wech nu bzan, re gu nlabeyy xomod nak ley. Ne gu lee ley nabeyy lo myet nebse leezha mban xaa. <sup>2</sup> Por ejempl nabeyy ley, leezha lee tub ngwnaa nkano me sa me, nzhaal kano me nebse xmbyi me dubse leezha mban xaa. Per chelee xmbyi me ngut, zee nzho mod chelya me kwaan stub xaabyi. <sup>3</sup> Per chelee me nchaal me stub xaabyi leezha mbanaka xmbyi me nle me jwalt. Per chelee xmbyi me ngut, nzho mod chelya me kwaan stub xaabyi nu nalet me tub kwaan nawent.

<sup>4</sup> Yilo mnabeyy ley cheen Dios lo be; per leezha ngut Jesucrist noka naka mod ngut be; zee nyentra mod nabeyy ley lo be. Nu leezha mroban Jesucrist noka naka mod mroban be, kwaanzee nal Jesucrist nabeyy lo be, sbaa nzho mod le be kwaan nzhekla Dios. <sup>5</sup> Nel leezha mban be mod nzhekla kwerp cheen be, lee ley nle zee masra mzhib yek be le be re kwaan nawent kwaan nzhekla kwerp cheen



be. Nu kwaane nzhenzo be naz lo yalgut. <sup>6</sup> Per nal, ngut be lo ley kwaan mnabeyy lo be yilo, kwaan mkee lo yech; snee nzho mod kee be zhiin lo Dios kwaan tub yalnaban kub, kwaan mle Mbi Naban cheen Dios lextoo be.

*Lee jwalt kwaan nzho leen kwerp cheen na*

<sup>7</sup> Nal, ¿cho kwaan nzak gu? ¿Che ley nle zee nle be jwalt? ¡Nawlita! Per nyent mod labeyy na jwalt chelee ley nyent. Nu tira nangnet na cho kwaan nak yalzoblazh, chelee lee ley nanét: “Nazoblazht lu xcheen sa myet lu”. [Ex. 20:17; Dt. 5:21] <sup>8</sup> Per lee jwalt mle zee mas mzebra yalnoblazh lextoo na nel lee ley nzhé nawenta. Nel chelee xaa nanet xaa cho kwaan nabeyy ley, zee nyent mod nabeyy jwalt lextoo xaa. <sup>9</sup> Leezha zer ne na cho kwaan nabeyy ley, nzak na wen nak na, per leezha mlabeyy na ley zee mzeen na lee na nak xaa nlera re jwalt, <sup>10</sup> nu nzhaal yet na. Dios mzaa ley zee kano na yalnaban, per ley mlu lo na nzhaal yet na. <sup>11</sup> Nel lee re jwalt nguzhal mod mkade na lo re kwaan nabeyy ley, nu kwaane nle zee nzhaal yet na.

<sup>12</sup> Lee ley cheen Dios nak kwaan wen; nu lee diizh kwaan mnabeyy Dios nali nak. <sup>13</sup> Per naniit na lee kwaan wen ne nle zee nzhaal yet na. ¡Nyent moda! Lee jwalt nle nawent re kwaan wen nu mkade jwalt na, nu nal nzhaal yet na lo re jwalt cheen na. ¡Kwaanzee lee jwalt nak tub kwaan tira nawent!

<sup>14</sup> Nu ne be Dios nak cho mzaa ley, per na nak tub xaa yizhyo ne nu lee jwalt tubka nabeyy lo na. <sup>15</sup> Nanet na chozhiin nle na kwaan nawent, nu nanlet na re kwaan wen kwaan nzhekla na le na, leel re kwaan nawent kwaan nayii na ne na, mer kwaan zee nle na. <sup>16</sup> Per leezha nle na mer re kwaan nawent kwaan nanzheklat na le na, nzeen na lee ley nxaal re kwaan wen. <sup>17</sup> Nu nii na, naleet na nle na re kwaan nawent, sinka naka re jwalt kwaan nzho leen

kwerp cheen na nleya. <sup>18</sup> Kwaanzee nela na nik tub kwaan wen nyent lo xkwerp na, nel leeya nak kwaan yizhyo ne. Nzhekla na le na kwaan wen per nyent mod le naya. <sup>19</sup> Nanlet na kwaan wen kwaan nzhekla na le na, sinka kwaan nawent kwaan nanzheklat na le na, komba nak kwaan nle na. <sup>20</sup> Per chelee na nle na re kwaan nanzheklat na le na, naleet mer na nleya, sinka re jwalt kwaan nzho naz leen lextoo na nleya.

<sup>21</sup> Nu snee naka, leezha nzhekla na le na kwaan wen, leel kwaan nawent nle na. <sup>22</sup> Lee naz mer leen lextoo na nyula na ley cheen Dios, <sup>23</sup> per nzeen na, lee naz leen kwerp cheen na nzho tub kwaan ndil kwaan re xgab wen cheen na. Nu nkadoo na lo kwaan nzho leen kwerp cheen na, mod tub xaa nzho lozhyib.

<sup>24</sup> ¡Nales doo nzhak na! ¿Cho nzho mod la na lo re kwaan nawent kwaan nle kwerp cheen na? Kwaane nle zee nzhaal yet na. <sup>25</sup> Nebse Jesucrist, Xaa Nabeyy na, nzho mod leya. ¡Dixkix Dios! Kwaanzee re xgab cheen na nzhekla le kwaan nzhé ley cheen Dios, per lee kwerp cheen na nzhekla le re kwaan nawent.

## 8

### *Lee Mbi Naban nzaa yalnaban*

<sup>1</sup> Kwaanzee nal, nyentra kwaan naab Dios kwent lo be, xaa tubka nzo kwaan Jesucrist. <sup>2</sup> Nu lee Mbi Naban cheen Dios nzaa yalnaban kwaan kub lo be nel Jesucrist mlou be lo yalnabeyy cheen jwalt, mer kwaan nzhanu be naz lo yalgut. <sup>3</sup> Nel Dios mle rese kwaan nyent mod ngle ley kwaan mzaa Dios lo Ches, nel rese myet tubka nayet xaa le kwaan nzhé ley. Kwaanzee mxaal Dios Xgann xaa mod tub myet, xaa nzeb jwalt, zee yet xaa xkwent be nu sbaa mlux xaa yalnabeyy cheen jwalt. <sup>4</sup> Mle xaa kwaane, zee nzho mod le be re kwaan wen kwaan nzhé ley, zee naletra

be re kwaan nzhekla xkwerp be, zee le be kwaan nzhekla Mbi Naban.

<sup>5</sup> Nel re xaa nle re kwaan nzhekla xkwerp, nebse re kwaan yizhyo nzho yek xaa; per lee xaa nle kwaan nzhekla Mbi Naban, ngwii lo nebse re kwaan nak xcheen Mbi Naban. <sup>6</sup> Nu lee xaa kwaan ngwii lo nebse re kwaan yizhyo ne, nebse zhin xaa lo yalgut; per lee re xaa nle kwaan nzhekla Mbi Naban, nebse zhin xaa lo yalnaban nu chul yo xaa. <sup>7</sup> Lee re xaa ngwii nebse lo re kwaan yizhyo ne nak xkontrad Dios, nel nixa nanzheklat xaa nu nixa nyent mod le xaa kwaan nzhé ley cheen Dios. <sup>8</sup> Kwaanzee lee re xaa nle re kwaan nzhekla xkwerp xaa, nyent mod le xaa kwaan nyula Dios.

<sup>9</sup> Per lee re be nangwiitra be lo re kwaan yizhyo ne, lee re be ngwii lo re kwaan nak xcheen Mbi Naban, chelee be wlipa nzho Mbi Naban cheen Dios lextoo be. Xaa nanzhot Mbi Naban cheen Jesucrist lextoo, nanakt xaa xaa Jesucrist. <sup>10</sup> Per chelee Jesucrist nzo lextoo be zee lee Dios ngwii lo be mod tub xaa nali, nu nixa ngut kwerp cheen be kwent cheen re jwalt kwaan mle be, per lee mbi naban cheen be mban kwent cheen Mbi Naban cheen Dios. <sup>11</sup> Nu chelee Mbi Naban cheen Dios, xaa mseban Jesucrist, nzho lextoo be, leeka xaa zaa stub yalnaban kwaan kub lo kwerp cheen be, nebse kwaan Mbi Naban cheen xaa.

<sup>12</sup> Kwaanzee, wech nu bzan, nzho tub kwaan nzhaal le be, per nanakta le be re kwaan nzhekla xkwerp be. <sup>13</sup> Nel chelee be nle be re kwaan nzhekla xkwerp be, zee yet be. Per chelee Mbi Naban cheen Dios nzho leen lextoo be, zee le xaa yudar be nalet be re kwaan nzhekla kwerp cheen be, zee le be gan yalnaban cheen be kwaan tira.

<sup>14</sup> Nel rese xaa nle kwaan nzhekla Mbi Naban cheen Dios nak xaa xinn Dios. <sup>15</sup> Nu mkayaa be Mbi Naban lo Dios, zee nazhebt be, sinka lee Mbi Naban nle zee nak be xinn Dios nu nzho mod yé be lo Dios: “Pa”. <sup>16</sup> Nu Mbi Naban ne

mbezih lo mbi naban cheen be lee be nak xinn Dios. <sup>17</sup> Nu nel nak be xinn xaa noka be kayaa re xcheen xaa, re kwaan mkayaa Xgann xaa Jesucrist, chelee be wlipa no be ded be re yalzi mod mded xaaya, zee gwluh kano be leeka xni kwaan nkano xaa.

*Lee yalchul kwaan yaad*

<sup>18</sup> Nii na, lee yalzi kwaan kaded be nal nyent mod gak lal kwaan xni cheen Dios kwaan luu lo be. <sup>19</sup> Nel rese kwaan mdexkwa Dios nkambaz doo nen cho gor luu Dios ne xana re xaa nak xinn Dios. <sup>20</sup> Rese kwaan mdexkwa Dios ngoka zee nyent mod gaka mod nzhaal gaka. Nangokta sbaa nel lee re kwaane nzhekla gak sbaa, sinka nel Dios nzhé sbaa gaka. Per noka re kwaan mdexkwa Dios nkambaza, <sup>21</sup> zee nen cho gor nanabeyytra yalgut loya, zee nzho mod gaka chul, mod chul gak re xinn Dios. <sup>22</sup> Axta nal ne be lee re kwaan mdexkwa Dios nded doo yalzi nu lee yalne cheena nak mod yalne cheen tub ngwnaa, gorna kayal xinn me. <sup>23</sup> Nu nanebt re kwaan mdexkwa Dios nded yalzi noka re be, xaa nzho Mbi Naban lextoo be, xaa nii lo be cho kwaan kayaa be lo Dios. Kwaanzee noka be nzeen yalne ne lextoo be, nel nkambaz be nen cho gor tira gak be xinn Dios, nu chee Dios kwerp cheen be zee gaka tub kwaan tira naluxtra nu nadedtraya bid. <sup>24</sup> Nal mle be gan yalnaban cheen be nel nkambaz be re kwaan zaa Dios lo be. Per chol lee kwaan nkambaz be nluya lo be, nanaktraya tub kwaan nkambaz be, nel nlulaya lo be nu nankintra kwaz beya. <sup>25</sup> Per chelee kwaan nkambaz be zeeraka luya lo be, nkin yela be kwaz beya.

*Tubka nanlaat Dios be*

<sup>26</sup> Nu leeka nal, lee Mbi Naban nle yudar be nel nagakt be naab be lo Dios mod nzhaal naab be lo xaa. Per leeka Mbi Naban naab lo Dios kwent cheen be kwaan dub lextoo xaa, per nanakta kwaan wdizh. <sup>27</sup> Nu Dios, xaa nlabeyy

lextoo rese myet, ne cho kwaan nzhekla Mbi Naban naab, nel lee Mbi Naban nzhedizhno Dios kwentaxa nyula Dios kwent cheen be, xaa nambey.

<sup>28</sup> Nela be lee Dios nle zee rese kwaan chul reke lo re xaa nkela Dios, re xaa mrezh Dios kwentaxa nzhekla Dios. <sup>29</sup> Lee re be mlabeeyla be Dios yilo, nu mleeyla Dios be zee gak be mod Xgann Dios, zee lee Xgann Dios gak xaa mas non lo re be, xaa nak wech xaa nu bzan xaa. <sup>30</sup> Nu lee re xaa mleeey Dios yilo, noka mrezh Dios xaa, nu zee noka mle Dios xaa xaa nali, zee noka mzaa Dios xni lo xaa.

<sup>31</sup> ¿Cho kwaan nzak gu lo re kwaane? ¡Chelee Dios nroo xjabor be, nik tub xaa nyent mod le gan lo be! <sup>32</sup> Chelee Dios namyent xaa Xgann xaa, sinka mzaa xaa xaa zee yet xaa kwent re xjwalt be, telisa zaa xaa lo re be kwaan Xgann xaa rese kwaan nkin be. <sup>33</sup> ¡Nik tub xaa nyent mod gaazh kwaan tich re be, xaa mleeey Dios! Nel Dios nzhé nali nak be. <sup>34</sup> Nu nik tub xaa nyent mod gaazh kwaan tich re be, xaa mleeey Dios, nel Jesucrist ngutla kwent cheen re jwalt cheen be, nu mroban xaa nu nal nzob xaa lad li lo Dios, nu naab xaa lo Dios zee chul yo re be. <sup>35</sup> Nik tub xaa nyent mod le zee nakelatra Jesucrist be. Nixa re bid kwaan nded be, nixa re xgab kwaan nzho yek be, nixa re xaa nrenal be, nixa yalnlaan, nixa nyent ler gak be, nixa nreke xaa tich be kwaan espad, rese kwaane nyent mod leya. <sup>36</sup> Kwentaxa nzhé lo Xkyech Dios:

Dios, kwent cheen lu yizata mbizh nzho mod yet nu, nu nle xaa nu mod tub mbakxiil, ma nzhut xaa. [Sal. 44:22]

<sup>37</sup> Per naluxt be lo rese kwaane. Telisa le be gan nel nkela Jesucrist be. <sup>38</sup> Nu ne wen na nik tub kwaane nyent mod le zee nakelatra Dios be:

nixa yalgut,  
nixa yalnaban,  
nixa re mandad cheen Dios,  
nixa re mbi mal,

nixa re kwaan nzho nal,  
 nixa re kwaan zhin gwluzh,  
<sup>39</sup> nixa pa ya doo nzeb,  
 nixa pa nech doo nzho,  
 nik tub re kwaan mdexkwaa Dios.  
 ¡Nik tub re kwaane nyent mod le zee nakelatra Dios  
 be! Mlu xaa yalnkela cheen xaa lo be leezha mxaal xaa  
 Jesucrist, xaa nak Xaa Nabeyy be.

## 9

*Dios mleey xaa Israel*

<sup>1</sup> Wlipa na nii na, nankadet na, nel na nak xaa Jesús,  
 nu lee Mbi Naban cheen Dios mzaa kwent kwaane lo na.  
<sup>2</sup> Nu nii na lo gu, nales doo nzhak lextoo na nu tubka  
 nzho yalnles lextoo na gorna nselazh na re sawlazh na, xaa  
 Israel. <sup>3</sup> Nu nzhekla na, chol nzho mod roo na lo Jesucrist  
 nu nya na lo ki, kwent cheen sawlazh na zee le xaa gan  
 yalnaban kwaan tira. <sup>4</sup> Dios mleey re nu gak nu xinn xaa,  
 nu kwaan xni chul cheen Dios mzo Dios lo nu, nu mlaa Dios  
 diizh kwaan le xaa lo nu, xaa nak dii Israel, nu mzaa Dios  
 ley lo nu, nu mlaa Dios gool nu lo Dios, nu myaan Dios zaa  
 xaa zyen doo kwaan lo nu. <sup>5</sup> Lee re xey nu, xaa ngu yilo,  
 nak xaa mzelo re dii cheen nu; nu noka Jesucrist ngok tub  
 xaa dii cheen nu, leezha myaad xaa mod myet, nu nal lee  
 xaa nabeyy lo rese kwaan. ¡Dixkix Dios, wen doo nak xaa!  
 ¡Sbaa naka!

<sup>6</sup> Nal lee re xaa sawlazh na nankayaat xtizh Dios, per  
 nayét be lee kwaan nzhé Dios nagakt. Nel naret dii cheen  
 Israel nak wlipa xaa Israel. <sup>7</sup> Nu sneeka naret dii cheen  
 Abraham nak wlipa dii cheen Abraham, nel Dios nzhé lo  
 Abraham: “Lee dii cheen lu gak kwent nebse lad cheen  
 Chak”. [Gn. 21:12] <sup>8</sup> Nu kwaane nii na naret dii cheen  
 Abraham nak xinn Dios. Kwaanzee xaa nak xinn Dios nak  
 re xaa mzaa Dios xtizh Dios lo. <sup>9</sup> Snee naka nel kwaan

wdizh ne nzhé Dios lo Abraham: “Stub liin gorna bare na stub welt, gal tub xgann rop gu Sara”. [Gn. 18:10]

<sup>10</sup> Per nanakta nebse kwaane. Noka lo Chak, xey nu, rop Rebek ngol kwech. <sup>11-13</sup> Nu leezha zeeraka gal rop xinn xaa, leezha zeeraka le xinn xaa nik tub kwaan, nixa kwaan wen nixa kwaan nawent, Dios nzhé lo Rebek: “Lee xaa gal yilotlaka gak xmos xaa gal gwluzh”. [Gn. 25:23] Nu leeka kwaane nzhé Xkyech Dios: “Mkedoola na Kob nu nayii na ne na Esau”. [Mal. 1:2-3] Nu snee mlakeya, zee ne be lee Dios nzho mod kweey xaa mod nzhekla xaa. Nu lee re xaa mleey Dios, mbezh Dios xaa, nu nanont lo Dios cho kwaan mle xaa.

<sup>14</sup> ¿Cho kwaan nzak gu? ;Telisa nanzheklat na nii na lee Dios nak tub xaa nanalit! <sup>15</sup> Nel Dios nzhé lo Ches: “Nkedoola na re xaa nzhekla na kela na, nu nlesdoola na ne na re xaa nzhekla na lesla na ne na”. [Ex. 33:19]

<sup>16</sup> Kwaanzee nagakt xaa xinn Dios nel nzhekla xaa, nixa nagakt xaa xinn Dios kwent cheen re kwaan nle xaa, gak xaa xinn Dios nel nlesla Dios ne xaa. <sup>17</sup> Nel lo Xkyech Dios, nzhé Dios lo faraón, xaa mnabeyy Egipto: “Mle na lu rey zee ne xaa dubse yizhyo nkano na gro doo yalnabeyy, leezha le na re kwaan nawent lo lu”. [Ex. 9:16]

<sup>18</sup> Kwaanzee Dios nlesla ne xaa re xaa nzhekla Dios, nu noka nle ned Dios lextoo re xaa nzhekla Dios gak ned.

<sup>19</sup> Kwaanzee chelee myet nkin le myet kwaan nzhekla Dios, telisa né gu lo na: “¿Chozhiin nayii Dios ne re myet?”

<sup>20</sup> Per lu nak tub myet yizhyo, nu nyent mod naab lu kwent lo Dios. Napa nel yé yas lo xaa mdexkwaaya, “¿Chozhiin snee mdexkwaa lu na?” <sup>21</sup> Lee xaa ndexkwaa yas nzho mod nabeyy xaa ban, zee le xaa kwaan nzhekla kwaan ban; nu kwaan ban nzho mod dexkwaa xaa tub yas chul doo, kwaan le xchiin xaa leezha yo xaa tub yalni, nu nzho mod dexkwaa xaa stub yas sbaasa.

<sup>22</sup> Dios nak mod xaa ndexkwaa yas. Nyedoola xaa ne xaa re xaa mdexkwaa xaa la yalnayii tich, zee labeyy re myet yalnabeyy cheen xaa, nel sbaa nzhekla xaa. <sup>23</sup> Snee mle xaa zee nzho mod mlesla xaa ne xaa re be, nu luu xaa re kwaan chul nu re xni cheen xaa lo be, re xaa mrezhla xaa axta yilo. <sup>24</sup> Kwaanzee snee mrezh Dios rese nu, xaa Israel nu noka re gu, xaa nanakt xaa Israel. <sup>25</sup> Modxa nzhé yech kwaan mkee Oseas:

Lee re xaa nangokt xaa na,  
yé na lee xaa nak xaa na;  
nu lee re xaa namkelat na,  
nkela na xaa nal. [Os. 2:23]

<sup>26</sup> Nu leeka zee paro nzhé xaa:

“Re gu nanakt xaa na”.

Leeka baa nzhé xaa:

“Gu nak xinn Dios, xaa naban”. [Os. 1:10]

<sup>27</sup> Nu xomod nzhé Chay cheen dii cheen Israel: “Nixa zyen doo dii xaa Israel mod re yux kwaan nzhi roo nistoo, per chepse xaa le gan roo lo yalzi cheen yalgut. <sup>28</sup> Nel merla naab Dios kwent cheen xaa dubse yizhyo.” [Is. 10:22-23] <sup>29</sup> Nu leeka Chay mkee:

Chol Xuz be, Xaa Nabeyy, nglaa dii cheen be,  
nal gorne gak be mod rop yezh kwaan nak Sodoma nu  
Gomorra. [Is. 1:9]

### *Xomod nzhaal zo myet nali lo Dios*

<sup>30</sup> ¿Cho kwaan nzak gu? Lee re xaa nanakt xaa Israel nakakwaant xaa zo nali xaa lo Dios, nixa seeya Dios mkiib jwalt cheen xaa nel ngwii xaa lo Dios. <sup>31</sup> Per lee nu, xaa Israel, xaa nzhekla le rese kwaan nzhé ley zee zo nali nu lo Dios, per namlet nu gan le nu kwaan nzhé ley. <sup>32</sup> ¿Chozhiin? Nel lee re nu, xaa Israel, namwiit nu lo Dios, lee nu mwii lo re kwaan nle nu. Kwaanzee mralnii nu kwaan “ke kwaan nralnii re xaa”. <sup>33</sup> Modxa nzhé Xkyech Dios:



Na zoob tub xaa yek yi Si6n,  
 lee xaa nak kwent tub ke kwaan ralnii rese xaa.  
 Nu loka xaa wii lo xaa ne,  
 nanzhebt xaa ne xaa Dios. [Is. 28:16]

## 10

<sup>1</sup> Wech nu bzan, kwaan naab na lo Dios nak, lee re sawlazzh na, xaa Israel, le gan yalnaban kwaan tira, nel kwaan ba nak kwaan nzhekladoo lextoo na. <sup>2</sup> Nroo na jabor cheen re xaa nel ne na lee re xaa nkela re xcheen Dios, per nanlabeyyt xaa mer kwaan wli. <sup>3</sup> Nu nanet re xaa xomod nzo nali Dios re myet lo Dios, kwaanzee nzhekla re xaa le re kwaan nzh6 ley cheen Dios zee sbaa zo xaa nali lo Dios; per nanet xaa wii xaa lo Jesucrist, xaa mzo Dios zee zo myet nali lo Dios; <sup>4</sup> nel Jesucrist mlozhaw rese kwaan nzh6 ley, zee loka xaa wii lo Jesucrist le gan zo nali lo Dios.

<sup>5</sup> Loka xaa nzhekla zo nali lo Dios kwent cheen ley kwaan mzaa Dios lo Ches, nzhaal le xaa kwaan nzh6ya, nel snee mkee Ches: “Loka xaa nle rese kwaan nzh6 ley, ban xaa nel mle xaa kwaan nzh6 ley”. [Lv. 18:5] <sup>6</sup> Per loka xaa nzhekla zo nali lo Dios nzhaal wii xaa lo Dios. Kwaanzee nanzhaalt nii be: “¿Cho xaa yixoob yiba, kwaan nle zee yaad Jesucrist naz yizhyo? <sup>7</sup> o ¿cho xaa la naz lo re xaa ngut le zee roo Jesucrist naz baa?” <sup>8</sup> Kwaanzee lee Xkyech Dios nii: “Lee Wdizh Chul cheen Dios nzo gax roo lu nu leen lextoo lu”. [Dt. 30:12-14] Kwaane nak Wdizh Chul cheen Dios kwaan nzaa nu kwent. <sup>9</sup> Nel chelee lu kwaan roo lu mbezh lu lee Jesucrist nak Xaa Nabeyy lu, nu kwaan lextoo lu ne lu lee Dios mseban Jesucrist, zee le lu gan yalnaban kwaan tira. <sup>10</sup> Nel leezha nle lu krer kwaan dub lextoo lu lee Dios mseban Jesucrist, sbaa gak lu tub xaa nali lo xaa, nu leezha mbezh lu lee Jesucrist nak Xaa Nabeyy lu, zee le lu gan yalnaban kwaan tira.

<sup>11</sup> Lee Xkyech Dios nzhé: “Loka xaa wii lo Jesucrist, natont xaa ne xaa Dios”. [Is. 28:16] <sup>12</sup> Lal nak nu, xaa Israel, nu re xaa nanakt xaa Israel lo Dios. Nel leeka Xaa Nabeyy nak Xaa Nabeyy lo rese xaa, nu nzaa xaa zyen doo kwaan chul lo re xaa naaba lo xaa. <sup>13</sup> Nel kwaane nak kwaan nzhé Xkyech Dios: “Rese xaa naab lo Xaa Nabeyy le xaa gan yalnaban kwaan tira”. [Joél 2:32] <sup>14</sup> Per, ¿xomod naab xaa lo Dios chelee xaa nangwiit xaa lo xaa? ¿Nu xomod wii xaa lo xaa chelee xaa nankenzhat xaa xtizh Dios? ¿Nu xomod kenzha xaa xtizh Dios cheleeya nik tub xaa nazaat kwenta lo xaa? <sup>15</sup> ¿Nu xomod zaa xaa kwent cheen wdizh chul lo stub xaa cheleeya nyent cho xaal xaa? Modxa nzhé Xkyech Dios: “¿Chul doo naka leezha nze tub xaa nzaa kwent cheen wdizh chul cheen Xaa Nabeyy!” [Is. 52:7]

<sup>16</sup> Per naret xaa nzaa yek gon wdizh chul. Modxa nzhé Chay lo Xkyech Dios: “Xaa Nabeyy, ¿cho xaa zaa yek gon wdizh chul kwaan nzaa nu kwent?” [Is. 53:1] <sup>17</sup> Kwaanzee nik tub xaa nyent mod wii lo Jesucrist cheleeya nyent cho mzaa kwent cheen Jesucrist lo xaa.

<sup>18</sup> Per, ¿cho kwaan nzak gu? ¿Che nambint re xaa wdizh chul? ¿Telisa mbin xaaya! Nel lee Xkyech Dios nzhé:  
Xaa dubse yizhyo mbin wdizh chul,  
axta pa mas zit lo yizhyo. [Sal. 19:4]

<sup>19</sup> Nu bare na nabdizh na lo gu, ¿cho kwaan nzak gu? ¿Che namlat re kwaane yek re xaa Israel, xaa nak sawlazzh na? Mlaya yek xaa nel yilo Ches mzaa kwent xtizh Dios, nu nzhé Dios:

Na le zee gak gu selos xomod kanap na stub naz xaa,  
xaa nanakt xaa yezh ne;  
nu le na zee yii gu ne gu stub naz xaa,  
xaa nanlabeyyt na. [Dt. 32:21]

<sup>20</sup> Nu noka Chay klar doo mkee xaa, leezha nzhé Dios:

Lee re xaa kwaan nakakwaant na, nguzhal na lo xaa;  
nu mlu na lo re xaa nambezht na. [Is. 65:1]

<sup>21</sup> Nu Chay nzaa kwent cheen sawlazzh na, mod nzhé Dios lo xaa: “Dubse zhe kabezh na gu, per nanzaat gu yek gu gon gu xtizh na nu mlaa gu na”. [Is. 65:2]

## 11

### *Tira namlaat Dios xaa Israel*

<sup>1</sup> Kwaanzee nanzheklat na nii na tira mlaa Dios re sawlazzh na, xaa Israel. ¡Telisa namlaat Dios xaa! Nel mer na nak xaa Israel, dii cheen Abraham naz lad cheen Benjamín. <sup>2</sup> Nel axta yilo, mleey Dios re sawlazzh na gak xaa xaa Dios; nu nal nalaat xaa xaa. ¿Che nselazzh gu xomod nzaa Xkyech Dios kwent kwaan nzhé Li, xaa nzhé lo Dios nawent nak re xaa Israel? Nu nzhé xaa: <sup>3</sup> “Xaa Nabeyy, mbit xaa rese xaa nzaa kwent kwaan nzhé lu lo lee xaa, nu mlux xaa lo re mdo, pa nteed xaa ma lo lu. Nebse na mban, per noka na nzhekla re xaa gut.” [1 Rey. 19:10, 14] <sup>4</sup> Per Dios mkeb lo xaa nu nzhé: “Natechot lu nak xaa nzo lo na, noka nkano na stub gazzh mil xaa, xaa zer kichxub lo maj cheen dios Baal”. [1 Rey. 19:18] <sup>5</sup> Nu sbaaka nal nzho zlak sawlazzh na nak xaa Dios, xaa mleey Dios kwaan yalnkala cheen Dios. <sup>6</sup> Nu chelee kwaane ngoka kwaan nebse yalnkala cheen Dios, nanaktraya nel mle xaa kwaan wen; nu chol ngaka nel mle xaa re kwaan wen, zee nangaktraya kwaan sbaasa nzellazzh Dios.

<sup>7</sup> Kwaan nzhekla na nii na nak, nanguzhalt kwaan kakwaan xaa sawlazzh na lo xaa. Nixa sbaaya lee lak nu, xaa mleey Dios, nguzhala lo nu; per lee re stub naz sawlazzh na Dios mle ngok ned lextoo xaa. <sup>8</sup> Modxa nzhé Xkyech Dios: “Dios mle ngok ned lextoo xaa, nu seetaka nak xaa axta mbizh nalzhe. Nel nixa nzho mod wii xaa re kwaan mle Dios nu nzho mod gon xaa re kwaan ngunii Dios, nanlat

re kwaan mle Dios nu re kwaan ngunii Dios yek xaa.” [Dt. 29:4; Is. 29:10] <sup>9</sup> Noka David nzhé:

Nzhekla na leezha kayaw xaa la xaa lo tub tramp,  
zee ralnii xaa nu ded xaa bid.

<sup>10</sup> Nzhekla na zhib yizhchool zaalo xaa nu

nik stub kwaan nayuntra lo xaa,

nu noka tira gak nalen tich xaa dubse mbizh mban xaa.

[Sal. 69:22-23]

*Lee yalnaban noka nak cheen re xaa nanakt xaa Israel*

<sup>11</sup> Nal nzhekla na nii na, namralt nii re sawlazzh na, xaa Israel tira, zee nayixchetra xaa. ¡Telisa yixche xaa! Mas wen leezha nambint re sawlazzh na xtizh Dios, ngoka zee nzho mod kayaa re xaa nanakt Israel yalnaban kwaan tira, zee snee gak selos re sawlazzh na ne re xaa nanakt xaa Israel. <sup>12</sup> Nu snee leezha mralnii re sawlazzh na, xaa Israel, nu mlaa xaa Dios, zee mle xaa zee nzho mod mkayaa re myet yizhyo, xaa nanakt xaa Israel, re kwaan chul cheen Dios; per mas gro kwaan kayaa re xaa nanakt xaa Israel gorna gak rese xaa sawlazzh na xaa Dios.

<sup>13</sup> Per nal nii na lo re gu, xaa nanakt xaa Israel, nel Dios mxaal na lo re gu, kwaanzee nzak na non doo xchinn na, <sup>14</sup> nel nzhekla na lee re sawlazzh na gak selos gorna wii xaa xomod mkayaa Dios re gu, nu snee zee nen che nzho mod le lak xaa gan yalnaban kwaan tira. <sup>15</sup> Nu cheleeya mlaa re sawlazzh na Dios, zee snee nzho mod kwi wen re myet lo Dios, ¿cho kwaan gak gorna kayaa re sawlazzh na Dios stuba? ¡Gak xaa mod xaa mroban lo yalgut! <sup>16</sup> Nel chelee pan kwaan mdexkwaa xaa yilo nak xcheen Dios, zee noka re kwaan dexkwaa gwluzh kwaan leeka koob gak xcheen Dios. Nu chelee re lox tub yag naka xcheen Dios noka re ram cheena nak xcheen Dios.

*Wdizh nabix cheen yag olib*

<sup>17</sup> Nal za na tub kwent nabix lo gu. Dios mxeen tub yag olib chul, nu mas gwluh mchoog xaa re ram cheena. Zee ngwa xaa naz wen nu mchoog xaa ram stub yag olib wen nu mkangeed xaa re ram ne lo xkyag olib xaa. Rese nu, xaa Israel, nak mod ram kwaan mchoog xaa yilo, nu rese gu nak mod re ram kwaan nkangeed xaa lo xkyag olib xaa. Kwaane nlu nkano gu re kwaan chul cheen Dios kwaan mkano re nu, xaa nak dii Israel, yilo. <sup>18</sup> Per nayét gu mas xwara gu lo re ram yag kwaan mchoog xaa. Bzelazh gu nel naleet gu nle zee mban loxa, sinka loxa nle zee mban gu, zee nyent mod to gu yalxwa.

<sup>19</sup> Talbes nzhekla gu yé gu: “Lee re ram zee mroog, zee mla nu xlugara lo yag olib kwaan mxeen Dios”. <sup>20</sup> Nu wliya. Per lee xaa namwiit lo Dios nak mod re ram kwaan mroog, nu lee re gu ngwii lo Dios zee nak gu mod ram kwaan nkangeed xaa lox xkyag olib xaa. Kwaanzee natot gu yalxwa, mas wen bzheb gu. <sup>21</sup> Nel chelee Dios mchoog re ram olib kwaan mxeen xaa, noka nzho mod le xaa gu sbaa. <sup>22</sup> Bwii, lee Dios nak tub xaa nlesdoola ne re myet. Nlesla xaa ne xaa gu chelee gu nze gu lo yalnkeela cheen xaa, per nalestla xaa ne xaa rese xaa nanzhont xtizh xaa. Kwaanzee chelee gu nazet gu lo yalnkeela cheen xaa, gak gu kwent ram kwaan mchoog xaa lo xkyag xaa. <sup>23</sup> Per stub lad, chelee re sawlazh na zelo xaa wii xaa lo Dios, bare Dios zob xaa lugar cheen xaa stub welt, nel Dios nkano yalnabeyy zob xaa xlugara xaa stub welt. <sup>24</sup> Nel chelee gu, xaa nanakt xaa Israel, mroog gu lo yag olib kwaan nzeb naz wen, nu nyaad gu ngyeed gu lo yag olib kwaan mxeen xaa (tub kwaan tira nanlet re myet), kwaanzee mas nzhora mod yeed re sawlazh na stuba, nel leeka xaa nak mer yag olib kwaan mxeen Dios.

*Xomod le re xaa Israel gan yalnaban kwaan tira*

<sup>25</sup> Wech nu bzan, nzhekla na ne re gu kwaane, tub kwaan xlaan kwaan le Dios, zee natot gu yalxwa. Lee re sawlazh na ngok ned lextoo nal, per kwaane kaded axta yilo gak re xaa nanakt xaa Israel, xaa Dios. <sup>26</sup> Nu gorna lee re xaa nanakt xaa Israel gak xaa Dios, zee rese sawlazh na le gan yalnaban kwaan tira, nel lee Xkyech Dios nzhé:

Lee xaa zaa yalnaban kwaan tira yaad naz Sión, nu koo xaa re xinn Kob lo re kwaan nawent. [Is. 59:20]

<sup>27</sup> Nu kwaane nak wdizh kwaan laa na lo re xaa, gorna kiib na re jwalt cheen xaa. [Jer. 31:33-34]

<sup>28</sup> Nu namkayaat re sawlazh na wdizh chul cheen Dios, snee ngok xaa xkontrad Dios. Nu snee ngoka, zee nzho mod lee re xaa nanakt Israel le gan yalnaban kwaan tira. Per seetaka nkela Dios re sawlazh na nel Dios mleeey re xey nu, xaa yilo. <sup>29</sup> Nel kwaan nzelazh Dios, telisa nakiibt xaaya stub welt lo re xaa mrezh xaa gak xaa xaa. <sup>30</sup> Lee yilo, nambint gu xtizh Dios, per lee nal re sawlazh na nanzhont xtizh xaa, zee mlesla Dios ne re gu. <sup>31</sup> Nu nal lee re sawlazh na nanzhont xtizh Dios, per kwaane ngok zee lesla Dios ne re gu; nu zhin mbizh lesla Dios ne Dios re sawlazh na, xaa Israel, kwentaxa mlesla xaa ne xaa re gu. <sup>32</sup> Nel mlaa Dios rese myet zee nambint xaa xtizh xaa, zee nzho mod luu xaa yalnlesla cheen xaa lo rese myet.

<sup>33</sup> ¡Wen doo nak Dios! ¡Gro doo nak re yalnzhak cheen Dios, nu nlabeyy xaa rese kwaan! Nu nik tub xaa nyent mod zaa kwent cho kwaan le xaa, nu nixa nyent mod la yek re xaa xomod nak Dios. <sup>34</sup> Nel nyent cho nlabeyy re kwaan nle Dios xgab, nu nik tub xaa nyent mod seed Dios tub kwaan. <sup>35</sup> Nik tub xaa nyent mod zaa tub kwaan lo Dios nu kwaz kix Diosa stub welt. <sup>36</sup> Nel Dios mdexkwa re rese kwaan, nu nebse lee xaa nle zee nzhoaya, nu snee zee tira naka xcheen xaa. ¡Tubka nzhaal gool be lo Dios rese mbizh! ¡Sbaa gaka!

## 12

*Xomod nzhaal zo be lo Dios*

<sup>1</sup> Nu nii na, wech nu bzan, nel mlesla Dios ne re be, nzhaal zaa be dub be lo Dios; mod nteed xaa ma lo Dios. Kwaane nak tub gon nambey nu mban kwaan nzaa be lo Dios, nu snee nak mod nzhaal gool be lo Dios; nu kwaane nak kwaan nyula Dios. <sup>2</sup> Nu nalet be re kwaan nle re xaa yizhyo ne, sinka nzhaal laa be chee Dios re xgab cheen be, nu snee ne be xomod nak kwaan nle Dios xgab kwaan nak kwaan wen, kwaan nyula Dios, nu kwaan nali nak.

<sup>3</sup> Nel nkela Dios na, zee mxaal xaa na kee na zhiin ne, kwaanzee naab na lo gu, nalet gu xgab lee gu xwa doo. Nel ngwii be lo Jesucrist, mas wen le be xgab mod tub xaa nzho yek. <sup>4</sup> Lee kwerp cheen myet nkano zyen doo pa, nu kad tub pa nkano tub zhiin nleya. <sup>5</sup> Nu sneeka, nixa zyen doo be, nak be mod tubka kwerp cheen Jesucrist, nu nkin be tub be stub be.

<sup>6</sup> Dios mzelazh kwaan lo rese be, zee le xchiin beya lo zhiin cheen Dios, nu mzelazh xaaya kwentaxa nzhekla xaa. Nu chelee Dios mzelazh kwaane lo be zee zaa be kwent kwaan né xaa lo be, zee le xchiin beya konxa ngwii be lo Dios. <sup>7</sup> Per chelee Dios mzelazh lo be, le be yudar stub naz xaa, zee le beya. Loka be mkayaa lu be xtizh Dios, nzhaal luu beya. <sup>8</sup> Chelee be mkayaa be yalnzhak zaa be rason lo re wech nu lo re bzan, nzhaal zaa beya tub mod chul. Loka be mkayaa lo Dios zelazh be tub kwaan lo stub xaa, zelazh beya kwaan dub lextoo be. Cheleeya lo be mzaa Dios nabeyy be lo re xaa Jesús, nzhaal nabeyy be tub mod nali. Loka be mkayaa lesla be ne be re xaa nkin tub kwaan, le be yudar xaa kwaan dub lextoo be.

<sup>9</sup> Kela be tub be stub be kwaan dub lextoo be. Laa be re kwaan nawent, nu reke be tich re kwaan wen. <sup>10</sup> Kela be tub be stub be mod nkela be re wech be nu re bzan be, nu le be xgab xwara stub be ke leeka be.

<sup>11</sup> Kee be zhiin lo Xaa Nabeyy kwaan dub lextoo be nu nachaabt be.

<sup>12</sup> Yakdoola be le be xgab kwaan nkambaz be; yela be ded be bid, nu tubka wdizhno be Dios.

<sup>13</sup> Nu le be yudar re wech nu re bzan leezha nkin xaa tub kwaan. Nu chul kayaa be stub naz xaa zhin garli be nu zaa be tub pa kwaz xaa.

<sup>14</sup> Naab be lo Dios kwent cheen re xaa nrenal be; nu nii be kwaan wen lo re xaa nge lo be.

<sup>15</sup> Le be chul gak lextoo be lo re xaa kwaan chul nzhak lextoo, nu gonn be kwaan re xaa kayonn.

<sup>16</sup> Kwi chul be kwaan re wechxinn be. Natot be yalxwa nu nzhaal yeen be kwaan re xaa sbaasa, nixa natot be yalxwa lo re kwaan nzhak be.

<sup>17</sup> Nazaret be tub kwaan nawent lo re xaa kwaan nawent nle lo be. Le be kwaan nzak rese myet nak kwaan wen.

<sup>18</sup> Le be zee kwi chul be kwaan stub naz re xaa, axta paro nzho moda lo be. <sup>19</sup> Rese be wech nu bzan, nazeret be re kwaan nawent mle stub naz xaa lo be, nzhaal laa be naab Dios xkwent xaa. Modxa nzhé Dios lo Xkyech Dios: “Lee na nzhaal naab kwent; nu na zereya, né Xaa Nabeyy”. [Dt. 32:35] <sup>20</sup> Kwaanzee nazeret beya. “Chelee xaa nrenal lu nlaan, bzaa kwaan gaw xaa, nu chelee xaa nzhak lextoo xaa, bzaa nis go xaa; nu snee le gu zee ton xaa”. [Pr. 25:21-22] <sup>21</sup> Nalaat be le re kwaan nawent gan lo be, sinka le be re kwaan wen zee le be gan lo re kwaan nawent.

## 13

<sup>1</sup> Nzhaal gon be xtizh re xaa nak zhiin, nel nebse Dios nzho mod zaa yalnabeyy lo xaa, nu Dios mle zee ngok xaa xaa nak zhiin. <sup>2</sup> Kwaanzee rese xaa nanzhont xtizh re xaa nak zhiin, noka nayii xaa ne xaa Dios, nel Dios mle zee ngok xaa xaa nak zhiin. Nu rese xaa nanzhont xtizh xaa, ted xaa xaa bid. <sup>3</sup> Nel re xaa nle kwaan wen nanzhebt xaa



ne xaa xaa nak zhiin, per re xaa nle kwaan nawent nzheb xaa ne xaa xaa nak zhiin. Chelee be nzhekla be nazhebt be ne be re xaa nak zhiin, le be re kwaan wen, zee ne wen xaa be, <sup>4</sup> nel re xaa nak zhiin nak xmos Dios, zee le xaa yudar be. Per chelee be nle be kwaan nawent nzhaal zheb be ne be xaa nak zhiin, nel lee xaa nak xaa nabeyy, nu nted xaa bid re xaa nle kwaan nawent. Nel xchiin Dios nle xaa, zee nteed xaa bid re xaa kwaan nle kwaan nawent. <sup>5</sup> Kwaanzee nkin le be kwaan né re xaa nak zhiin, zee nateedt xaa be bid, nu nel nela be xana kwaan nzhaal le be. <sup>6</sup> Kwaanzee nzhaal kix be kwent cheen leyo lo re xaa nak zhiin nel lee xaa nak xaa mlaa Dios le zhiin ne.

<sup>7</sup> Kix be lo kad tub xaa kwaan nzhaal yex lo. Kix be lo re xaa nak zhiin rese kwaan nzhaal kix be lo xaa; nu sbaaka nii be wdizh wen lo xaa nu lo re xaa nzhaal nii be wdizh wen lo; nu wii be respet lo re xaa, kwaan nzhaal wii be respet lo.

<sup>8</sup> Nik tub kwaan nanzhaalt zeb be lo stub xaa. Per kwaan nzeb be nak yalnkele lo wechxinn be, nel loka xaa nkela wechxinn nle xaa rese kwaan nzhé ley. <sup>9</sup> Nel lo ley kwaan mzaa Dios lo Ches nzhé:

Nakanot lu xngwnaa stub xaa,

naguta lu wechxinn lu,

nalewannt lu,

nazoblazht lu. [Ex. 20:13-17, Dt. 5:17-21]

Re kwaan nu re stub naz kwaan mnabeyy Dios, nak tubka kwaan: “Bkela wechxinn lu mod nkela lu leeka lu”. [Lv. 19:18] <sup>10</sup> Loka xaa nkela nanlet xaa nik tub kwaan nawent lo wechxinn xaa, nu sbaa nle xaa rese kwaan nzhé ley.

<sup>11</sup> Kwaanzee nkin le be re kwaan nel nela be xomod nak re mbizh nzho be nal; nkin roo mkaal lo be, nel mzhin gaxla mbizh leezha zaa Dios yalnaban lo be; nu nel mas mzhin gaxla mbizh nal ke leezha mbin be wdizh chul cheen Dios. <sup>12</sup> Nel nal merla mded yaal nu merla nguni yizhyo; kwaanzee nkin naletra be re kwaan mle be leezha

mzo be lo yalnakaw; nkin gak be xab be, kwaan nak cheen Dios kwaan nla xni cho, mod tub soldad, xaa list nzo.

<sup>13</sup> Kwaanzee le be kwaan wen modxa nle xaa zhe:

nayat be yalni pa nle xaa rese kwaan nzhekla xkwerp xaa, nazuzht be,

nachaalt be stub sa myet be,

nadildiizht be,

nazoblazht be.

<sup>14</sup> Zo be gax lo Jesucrist zee gak be mod tub soldad xaa nkee yiib xuk, nu tira nalet be re kwaan nzhekla kwerp cheen be.

## 14

### *Nagawyixt be wech be nu bzan be*

<sup>1</sup> Chul kayaa be re xaa nanyet nzo ngwii lo Dios, nu nagawyixt be xaa. <sup>2</sup> Nel tub naz xaa nzak nzho mod gaw xaa rese kwaan, nu lee stub naz xaa nanyet nzo lo re kwaan nak xcheen Dios, nanzhawt xaa baal, nebse re kwaan naye nzhaw xaa. <sup>3</sup> Kwaanzee lee re xaa kwaan nzhaw rese kwaan, nanzhaalt yé xaa, mas wenra xaa ke stub naz xaa nanzhawta. Nu lee re xaa kwaan nanzhawt rese kwaan, nanzhaalt yé xaa lee re xaa nzhaw rese kwaan nak xaa nawent, nel Dios mkayaala tub naz xaa stub naz xaa. <sup>4</sup> Nanzhaalt gawyix be wechxinn be, nel re be nak xmos Xaa Nabeyy, nu lee Xaa Nabeyy nak xaa nzho mod nabeyy xmos xaa, nu nanakta be. Nu telisa kayaa Xaa Nabeyy xmos xaa nel nzhak Xaa Nabeyy kanap xaa.

<sup>5</sup> Nu nzho stub kwaan, nzho lak xaa nzak mas nonra tub mbizh ke stub mbizh, nu nzho zlak xaa nzak rese mbizh lal. Kad tub be nzhaal le xgab mod nzak be mas wenra.

<sup>6</sup> Loka xaa ngozhaw tub mbizh, ngozhaw xaaya zee gool xaa lo Xaa Nabeyy. Nu loka xaa nzhaw rese kwaan, nzhaw xaaya nel nkela xaa Xaa Nabeyy nu nzaa xaa dixkix lo xaa.

Nu loka xaa nanzhawt rese kwaan nle xaaya nel nkela xaa Xaa Nabeyy nu noka nzaa xaa dixkix lo xaa.

<sup>7</sup> Nel nambant re be zee le be kwaan nzhekla be, nixa nayeta be nel nzhekla be. <sup>8</sup> Nel chelee be mban be, mban be zee kee be xchiin Xaa Nabeyy, nu chelee be yet be, yet be nel nzhekla Xaa Nabeyy yet be. Kwaanzee, chelee be mban be nu chelee be ngut be, xaa Xaa Nabeyy nak be. <sup>9</sup> Nel kwaanzee ngut Jesucrist nu mbare xaa mroban xaa stub welt, zee gak xaa Xaa Nabeyy lo re xaa mban nu lo re xaa ngut.

<sup>10</sup> Kwaanzee, ¿chozhiin ngaazh be kwaan tich wech be? nu ¿chozhiin nzhak gaya be lo xaa? Nel rese be zhin lo Dios tub mbizh, zee naab xaa kwent lo be. <sup>11</sup> Nel lee Xkyech Dios nzhé:

Mban na, né Xaa Nabeyy,  
rese myet kichxub delant lo na,  
nu rese myet gool lo Dios. [Is. 45:23]

<sup>12</sup> Kwaanzee sbaa, kad tub be zaa kwent cheen lo Dios.

### *Le be kwaan wen lo re xaa Jesús*

<sup>13</sup> Kwaanzee nagawyixt be tub be stub be. Wii be xana re kwaan nle be, zee nalet be zee ralnii stub be, zee laa xaa re xcheen Dios. <sup>14</sup> Kwaanzee mlu Jesucrist kwaane lo na nu lee xaa nak Xaa Nabeyy na; wena nzho mod gaw be rese kwaan, per chelee tub be nzak nawenta, nazhaalt gaw xaaya. <sup>15</sup> Per cheleeya kwaan nzhaw be nle zee nawent gak lextoo wech be, zee lee kwaan kale be nlu nankelat be xaa. Wii be xana re kwaan gaw be, zee nalet be laa wech be nu bzan be re xcheen Dios, nel noka ngut Jesucrist kwent cheen xaa. <sup>16</sup> Kwaanzee nalaat be nii xaa nawent kwaan nzak be wen nak, nel nzak xaa nawent mod nle be. <sup>17</sup> Kwaanzee leezha nabeyy Dios lextoo be, nanont kwaan nzhaw be nixa kwaan nzho be, kwaan non nak zo nali be lo Dios nu kwi chul be, zee yakla be nel lee Mbi Naban cheen

Dios nzo kwaan be. <sup>18</sup>Loka xaa snee nzo lo Jesucrist, nyula Dios xaa nu noka re myet nyula xaa.

<sup>19</sup>Kwaanzee nzhaal kwaan be zee chul kwi re be; zee snee nzho mod le be yudar tub be stub be, zee zo nyera rese be lo Dios. <sup>20</sup>Nanzhaalt lux be xchiin Dios lextoo stub be, nebse kwent cheen kwaan nzhaw be. Rese kwaan nzhaw xaa nak wen, lee kwaan nawent nak gaw be tub kwaan le zee ralnii stub wech be. <sup>21</sup>Mas wen nagawt be baal, nixa nagot be xis ub, nixa nalet be stub naz re kwaan, kwaan le zee ralnii stub be. <sup>22</sup>Lee mod nzak be lo kwaanee, nebse nzhaal gaka tub kwaan lo be nu lo Dios. ¡Nix doo nzhak lextoo xaa kwaan kale kwaan wen! <sup>23</sup>Per lee xaa nzhaw tub kwaan nu nzak xaa nawent gaw xaaya, nle xaa jwalt nel nzak xaa nawent gaw xaaya. Nu loka kwaan nle be, chelee be nzak be nawent naka, jwalt naka lo be.

## 15

### *Nanzhaalt le be nebse kwaan nyula be*

<sup>1</sup> Rese be, xaa nye nzo lo re xcheen Dios, nzhaal yela be ne be re xaa nanyet tant nzo lo re xcheen Dios; nu nakwaant be kwaan nyula leeka be. <sup>2</sup> Rese be nzhaal le be kwaan nyula re wechxinn be, zee mas nyera zo xaa lo re xcheen Dios. <sup>3</sup> Nel nixa Jesucrist, namkwaant xaa le xaa re kwaan nyula xaa; nu re kwaan mle xaa nak kwaan nkee lo Xkyech Dios, leezha nzhé Dios: “Lee re wdizh nawent kwaan nii xaa lo lu noka ngunii xaaya lo na”. [Sal. 69:9] <sup>4</sup> Nel rese kwaan mkee xaa lo Xkyech Dios yilo mkeeya zee seed be; zee nzho mod yela be ded be re bid nu leeya seleyy be leezha nkambaz be gak re kwaan nguné Dios. <sup>5</sup> Nzhekla na lee Dios, xaa nyedoola nu xaa nseleyy be, le yudar gu zee chul kwi gu kwaan re wechxinn gu, modxa mlu Jesucrist, <sup>6</sup> zee rese be kwaan tubka bos gool be lo Dios, xaa nak xuz Jesucrist, Xaa Nabeyy be.

*Pab mzaa kwent wdizh chul lo re xaa nanakt xaa Israel*

<sup>7</sup> Kwaanzee, chul kayaa be re wechxinn be, modxa mkayaa Jesucrist be, zee zyen doo myet gool lo Dios. <sup>8</sup> Nii na lo gu, lee Jesucrist myaad mkee zhiin lo re sawlazzh na, xaa Israel, zee gak rese kwaan nzhé xaa lo re xey nu, xaa yilo nu snee luu xaa lee Dios nak tub xaa wli lo re kwaan nii xaa. <sup>9</sup> Noka myaad xaa zee gool re xaa nanakt xaa Israel lo Dios nel mlesla xaa ne xaa xaa, modxa nzhé Xkyech Dios: Kwaanzee gol na lo lu delant lo re xaa dubse yizhyo, nu gol na wen nak lu. [2 Sam. 22:50; Sal. 18:49]

<sup>10</sup> Lee stub pa lo Xkyech Dios nzhé:

Bill gu, re xaa nanakt xaa Israel,  
tubka kwaan re xaa nak xaa Dios. [Dt. 32:43]

<sup>11</sup> Lee stub pa nzhé:

Rese gu, xaa nanakt xaa Israel, bill gu lo Dios,  
bill re gu kwaan re myet lo Dios. [Sal. 117:1]

<sup>12</sup> Nu noka Chay mkee:

Lo dii cheen Isaí, xuz David,  
roo tub xaa nabeyy lo dubse yizhyo,  
nu lo lee xaa wii re xaa nanakt xaa Israel. [Is. 11:10]

<sup>13</sup> Nzhekla na lee Dios, xaa zaa kwaan nkambaz be, le nix lextoo re gu zee chul kwi re gu, nel ngwii gu lo xaa, zee yela gu kwaz gu re kwaan nguné xaa zaa xaa lo be, nel nkano gu yalngezh cheen Mbi Naban lextoo gu.

<sup>14</sup> Rese gu wech nu bzan, ne wen na lee gu nle kwaan wen, nu nkano gu yalnzhak, zee nzho mod seedra gu re wechxinn gu, xaa nagakt. <sup>15</sup> Per nzho rol pa namzhebt na mkee na klar doo kwaan nzhaal nii na lo gu, zee tira nayenzlazht guya; sbaa mkee naya nel Dios mxaal na kee na zhiin ne lo yalnkele cheen xaa. <sup>16</sup> Mxaal xaa na, zee kee na zhiin lo Jesucrist, nu mxaal xaa na lo re xaa nanakt xaa Israel. Kwaan nle na nak, za na kwent cheen wdizh chul, mod tub ngwleyy lo re xaa nanakt xaa Israel zee nzho mod

gak xaa mod tub gon nzhu lo Dios, tub kwaan mle Mbi Naban.

<sup>17</sup> Nel tubka nzo Jesucrist kwaan na, nzho mod to na yalxwa lo re zhiin kwaan nkee na lo Dios. <sup>18</sup> Kwaanzee nyent mod nii na stub kwaan cheleeya nanakta kwaan mle Jesucrist kwaan na, zee lee kwent kwaan nii na nu kwaan nle na, lee re xaa nanakt xaa Israel gon xtizh Dios, <sup>19</sup> nu lee re kwaan gro kwaan mle Mbi Naban kwaan yalngezh cheen xaa lo re xaa, mle Dios zee mbin xaa xtizh Dios. Nu snee nzho mod kaza na kwent cheen wdizh chul; mzelo na axta yezh Jerusalén nu mzhin na axta yezh Ilírico. <sup>20</sup> Kwaanzee nzhekla na za na kwent cheen wdizh chul pa zer gon xaa cho kwaan mle Jesucrist. Nel chelee na za na kwenta pa mbinla xaaya, zee gak na kwenta tub xaa za tub yoo tich simyent xcheen stub xaa. <sup>21</sup> Modxa nzhé Xkyech Dios:

Gon re xaa kwaan nik tub welt zer ne cho nak Dios;  
nu laya yek re xaa kwaan nik tub welt zer gon cho nak  
Dios. [Is. 52:15]

*Pab nle xgab ya yezh Roma*

<sup>22</sup> Nzhekla na yal na lo re gu per lee xchinn na kale tras na, zee zeeraka yal na lo re gu. <sup>23</sup> Per nal, ngulola mgaan na xtizh Dios re yezh ne; nu nel nzha doo liin nzhekla na yal na lo gu, <sup>24</sup> nal nzhekla na ya na naz España, nu gorna ya na naz ba deed na Roma. Nu gorna zhin na lo gu, zee wdizh be chep, zee nen che nzho mod le gu yudar na ya na España. <sup>25</sup> Per nal ya na Jerusalén, yalaa na tub gon lo re xaa mle Jesús nambey, xaa nzho baa. <sup>26</sup> Nel lee re xaa yizhyo Macedonia nu yizhyo Acaya ngol lextoo re xaa mzaa xaa tub gon lo re xaa Jesús, xaa prob, xaa nzho yezh Jerusalén. <sup>27</sup> Nu myula re xaa mle xaaya. Nu wli nzeeb xaa kwaan lo re xaa Jesucrist, xaa sawlazzh na, nel mzaa re nu kwent cheen wdizh chul cheen Jesucrist lo re xaa nanakt xaa Israel, kwaanzee nal nzhaal le xaa yudar re xaa

Jesucrist, xaa Israel kwaan demi. <sup>28</sup> Kwaanzee gorna yilo le na zhiin ne, gorna yilo za na gon ne lo re xaa Jesucrist, xaa sawlazzh na; zee roo na baa nu deed na lo re gu, zee ya na naz España. <sup>29</sup> Ne wen na gorna yal na naz baa, nzho mod le Jesucrist tub kwaan chul lo re gu.

<sup>30</sup> Wech nu bzan, kwent cheen Jesucrist nu kwaan yalnkala kwaan nzaa Mbi Naban lo be, naab na lo gu zee tubka naab gu lo Dios zee kanap Dios na. <sup>31</sup> Naab gu lo Dios zee nayigat na lo re xaa kwaan nangwiit lo Jesucrist, xaa kwaan nzho yizhyo Judea, nu zee wen kayaa re xaa mle Jesús nambey, xaa Jerusalén, gon kwaan nzhan na. <sup>32</sup> Kwaanzee chelee Dios nzhekla, naab gu lo xaa zee chul gak lextoo na gorna zhin na lo re gu nu nzho mod kwaz na tub deskans lo re gu. <sup>33</sup> Nzhekla na lee Dios, xaa nle zee chul kwi rese be, kanap rese gu. ¡Sbaa gaka!

## 16

### *Dix kwaan gwuluzh*

<sup>1</sup> Naab na lo gu zee chul kayaa gu bzan be Febe, nel lee me nkee zhiin lo re xaa Jesucrist yezh Cencrea. <sup>2</sup> Chul bkayaa gu me kwent cheen Xaa Nabeyy, mod nzhaal kayaa gu re xaa mle nambey Jesús. Nu ble gu yudar me loka kwaan nkin me, nel lee me nz hale yudar zyen doo xaa nu axta na mle me yudar.

<sup>3</sup> Guzh gu “dix” kwent cheenta lo Priscila nu lo sa me Aquila, xaa nkee zhiin kwaan na lo xchiin Jesucrist. <sup>4</sup> Lee rop xaa ba mle yudar na leezha mer yet na nixa noka lee xaa mle ryez yet; nu natechot na nza na dixkix lo xaa, noka re xaa Jesús, re xaa nanakt xaa Israel nzaa dixkix lo xaa. <sup>5</sup> Nu noka sbaa guzh gu “dix” lo re xaa Jesucrist, xaa nkasa garli Priscila nu Aquila. Noka guzh gu “dix” lo xmig na wech Epeneto, xaa tant nkedoola na, xaa yilotlaka mwii lo Jesucrist yizhyo Asia. <sup>6</sup> Noka guzh gu “dix” cheenta lo

Mari, me tant nzha doo mbizh nkee zhiin lo re gu. <sup>7</sup> Noka guzh gu “dix” lo rop sawlizh na, wech Andrónico nu wech Junias, xaa tubka ngu lozhyib kwaan na. Nu nlabeyy wen re xaa mkayaa yalnabeyy lo Jesucrist xaa, nu rop xaa ngok tub xaa Jesucrist mas yilo ke na.

<sup>8</sup> Guzh gu “dix” cheenta lo xmig na wech Ampliato, xaa tant nkedoola na kwent cheen Xaa Nabeyy. <sup>9</sup> Guzh gu “dix” cheenta lo wech Urbano, xaa tubka nkee zhiin kwaan na lo xchiin Jesucrist, nu noka lo wech Estaquis, xaa nkedoola na. <sup>10</sup> Guzh gu “dix” cheenta lo wech Apeles, nel mle xaa gan lo preb ngwii xaa lo Jesucrist; nu noka lo re xaa nzho li wech Aristóbulo. <sup>11</sup> Guzh gu “dix” cheenta lo sawlizh na wech Herodión, nu lo re xaa Xaa Nabeyy, xaa nzho li wech Narcis. <sup>12</sup> Guzh gu “dix” cheenta lo bzan Trifena nu lo bzan Trifosa, me tant nkee zhiin lo Xaa Nabeyy. Noka guzh gu “dix” cheenta lo bzan be Pérsida, nel nkedoola re xaa Jesús me, tant kakee doo me xchiin Xaa Nabeyy. <sup>13</sup> Guzh gu “dix” cheenta lo wech Rufo, tub xaa non doo lo Xaa Nabeyy; nu noka lo xnaa xaa, me nzak na mod xnaa na. <sup>14</sup> Guzh gu “dix” cheenta lo wech Asíncrito, lo wech Flegonte, lo wech Hermas, lo wech Patrobas, lo wech Hermes, nu noka lo re wech kwaan nzhi kwaan lee xaa. <sup>15</sup> Nu noka guzh gu “dix” cheenta lo wech Filólogo nu lo bzan Jul, nu noka lo Nereo, nu lo bzan xaa, nu lo Olimpás nu lo rese xaa mle nambey Jesús kwaan nzhi kwaan lee xaa.

<sup>16</sup> Kad tub gu guzh “dix” lo re wech gu nu lo re bzan gu nu daw gu tub bit tagarlo tub xaa stub xaa tub mod nali. Nu noka rese xaa mle nambey Jesús nxaal “dix” lo re gu.

<sup>17</sup> Rese gu wech nu bzan, naab na lo re gu zee zeen gu cho xaa nle zee nzhak rol gu, nu nle zee nralnii re xaa lo xcheen Xaa Nabeyy. Re xaa ne nanlet re kwaan mseed re gu. Bachii gu lo re xaa snee nak, <sup>18</sup> nel nankeet re



xaa ne xchiin Jesucrist, lee re xaa kakwaan kwaan nyula leeka kwerp cheen xaa; nu kwaan re wdizh chul cheen xaa nkade xaa re xaa nanyet nzo lo Jesucrist. <sup>19</sup> Rese xaa nzho nee, ne lee re gu nak xaa nzhon xtizh Dios nu kwaanzee nyakla na; nu nzhekla na seed gu le gu rese kwaan wen, nu nalet gu re kwaan nawent. <sup>20</sup> Nu snee lee Dios, xaa nle zee chul nzhi re be, le zee le be gan lo Maxuu. Nzhekla na lee Jesucrist, Xaa Nabeyy be, luu re yalnkele cheen xaa lo gu.

<sup>21</sup> Nxaal Timoteo “dix” lo re gu, xaa kwaan nkee rop nu zhiin. Noka Lus, nu Jasón, nu Sosípater, xaa nak xaa sawlizh na, nxaal re xaa “dix” lo re gu.

<sup>22</sup> Na nak Tercio, xaa kakee xtizh Pab lo yech ne, nu noka na xaal na “dix” cheenta lo re gu kwaan le Xaa Nabeyy.

<sup>23</sup> Noka wech Gayo nxaal “dix” lo gu. Nzhoo na garli xaa, nu ntache xaa garli xaa nzhak kult. Noka wech Erasto nxaal “dix” lo re gu, xaa nak tesorer yezh ne, nu wech be Cuarto nxaal “dix” lo re gu. <sup>24</sup> Nzhekla na lee Jesucrist, Xaa Nabeyy be, kanap rese gu. Sbaa gaka.

*Re wdizh gwluzh kwaan nzholl Pab lo Dios*

<sup>25</sup> Gool be lo Dios, xaa kwaan nzho mod le zee nye zo re be lo xaa, modxa nza na kwent cheen Jesucrist. Kwaan nza na kwent nak kwaan mlu Dios lo be, tub kwaan ngulaan axta leezha zeeraka dexkwaa yizhyo. <sup>26</sup> Per nal mlu Dios lo be kwaan nzho yek Dios le Dios, nel snee mkeela re xaa yilo, re xaa mzaa kwent kwaan nzhé Dios lo lee xaa, zee labeyy rese xaa dubse yizhyoya. Kwaanzee Dios, xaa tubka mban, mnabeyy gak rese kwaane, zee wii re myet lo Jesús.

<sup>27</sup> ¡Nzhekla na lee Dios, xaa nzhak rese kwaan, kayaa re wdizh chul nu gool re myet lo xaa, nal nu rese mbizh, kwent cheen kwaan chul kwaan mle Jesucrist!

¡Sbaa gaka!

Pab

## Wdizh kwaan nyaadno yalnaban

New Testament in Zapotec, Amatlán (MX:zpo:Zapotec, Amatlán)  
copyright © 2009 Wycliffe Bible Translators, Inc.

Language: Zapotec, Amatlán

Translation by: Wycliffe Bible Translators, Inc.

Zapotec, Amatlán

zpo

Mexico

### Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Amatlán

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 29 Jan 2022 from source files dated 29 Jan 2022

3efd442b-8972-5bb1-99a1-81f28edf99a8